

張氏醫通

張氏醫通卷之十

長洲石頭張

璐路王父

男

登誕先

倬飛疇

恭訂

婦人門上

經候

經曰女子手少陰脈動甚者妊子。

婦人以血爲主故手少陰動甚爲懷身之象胎稟在下反以上部動甚爲胎脈之驗者蓋陽神氣旺。

與尺內陰搏陽別同一胎脈而有左右上下陰陽
男女之辨是以內經特爲昭揭

二陽之病發心脾有不得隱曲女子不月其傳爲風
消其傳爲息責者死不治

手足陽明皆曰二陽不得隱曲言情欲不遂而病
發心脾也風消者發熱消瘦胃主肌肉也息責者
喘息上奔胃氣上逆也此節雖言病發心脾而實
重在胃氣心爲胃之母胃爲脾之府且與大腸一
氣貫通焉有母傷而子獨安藏病而府不病之理

有病胸脇支滿者妨於食病至則先聞腥臊臭出清液先唾血四支清目眩時時前後血病名血枯此得之年少時有所大脫血若醉入房中氣竭肝傷故月事衰少不來也治之以四烏鯁骨一蔥茹二物并合之丸以雀卵大如小豆以五丸爲後飯飲以鮑魚汁利腸中及傷肝也

此段經文全重在氣竭肝傷四字爲通節之綱旨胸脇肝部也支滿肝病也妨於食木邪凌土也病則先聞腥臊臭脾喜芳香今脾土爲木邪凌肝病

則先開腥臊。臊乃肝之旺氣也。出清液。脾虛不能敷化水精也。先唾血。脾傷不能統運營血也。四肢清陽衰不能傍達四末也。目眩。陽不充而水上溢於經也。前後血陰受傷。面血內溢於絡也。血枯。內有乾血。血不歸經而結胞門也。良由血少。不禁氣竭。肝傷而致月事衰少或不來也。治以烏鰂骨四分。取其味鹹走腎。性溫達肝。配以應如一分。取其辛散肉風。溫去惡血。二物并合。功專破宿生新。九以雀卵取其溫補助陽。能調子藏精血。以五丸爲

後飯者先藥後飯使藥徐行下焦力貴專攻五九
不爲少也飲以鮑魚汁利腸垢和肝傷取其臭穢
之味佐烏鯁骨而辟宿積之血也烏鯁血黑如墨
用之書契則有賊人之害故又名烏賊入腎走血
而不傷伐真元功在蠱蛭之上故諸本草薏苡卽
是薏根功專散血不可誤認蘭茹蘭茹辛寒有毒
功專外科觀本經主治可知

金匱云婦人之病因虛積冷結氣爲諸經水斷絕至
有歷年血寒積結胞門寒傷經絡凝堅在上嘔吐逆

唾久成肺癰形體損分在中盤結繞臍寒疝或兩脇
疼痛與藏相連或結熱中痛在關元脈數無瘡肌若
魚鱗時著男子非止女身在下水多經候不勻令陰
掣痛少腹惡寒或引腰脊下根氣衝氣衝急痛膝脛
疼痛奄忽眩冒狀如厥癰或有憂慄悲傷多嗔此皆
帶下非有鬼神久則漏瘦脈虛多寒審脈陰陽虛實
緊弦行其鍼藥治危得安其雖同病脈各異源
婦人經閉諸病無不由虛寒而成經閉雖屬虛寒
則崩漏之屬虛熱從可識矣夫經水歷年斷絕則

瘀積結於胞門寒氣凝於經絡蓋下焦寒積結聚
則中上二焦皆不得通暢所以在上則寒沫結聚
而爲欬欬久熱結而爲肺癰在中則寒飲結聚而
爲疝疝久熱結亦爲內癰大抵內癰皆起於結血
故申之以脈數無瘡肌若魚鱗昭揭病形然此不
但婦人也男子亦有是證總由經絡鬱閉寒從火
化所致至於在下則經候雖不調而不至斷絕所
瘀亦爲不多其證雖久但少腹氣衝引急寒痛也
其或膝脛疼痛者以四肢爲諸陽之本寒結於內

則在下之陽不能上入故膝脛反熱而痛也。至如
奄忽狀如厥顛或時憂慘悲嘆有若鬼神所憑此
皆陽神虛寒不能統攝濁陰發爲帶下之候故以
久則羸瘦脈虛多寒證之然多寒言屬寒者多非
絕無屬熱者假如羸瘦而脈數又爲陰虛多熱矣
設形盛而脈虛豈不爲氣虛多寒乎形盛而脈滿
寧不爲溼熱固結乎斯其所以爲同脈異源也
寸口脈弦而大弦則爲減大則爲芤減則爲寒芤則
爲虛寒虛相搏此名爲革婦人則半產漏下旋復花

湯主之

脈弦而大按之減小而芤者爲表裏失血之候以
其脈弦大無力而少徐緩冲和之氣故謂之革言
胃氣近於革除也蓋弦爲陽氣少芤爲陰血虛婦
人得之主半產漏下以旋復花湯主之本草謂旋
復花主結氣葱白主寒熱新絳乃絲帛之染緋者
主活血三味入肝理血除邪散結豈非以氣少無
陽則寒血虛無陰則熱兩虛相搏以害其肝之生
化歟若不明其相搏止謂之虛何以用旋復花葱

白皆解客熱之邪者而不用溫補其虛乎

婦人陷經漏下黑不解膠薑湯主之

氣暢而血從則百脈流動以候天癸苟有邪以阻之則血不從其氣而自陷於血海血海者腎主之腎者寒水也其色黑是以漏下黑矣猶內經所謂結陰下血也。林億云臣億等較諸本無膠薑湯方當是妊娠中膠艾湯

婦人少腹滿如敦狀小便微難而不渴。生後者此爲水與血俱結在血室也大黃甘遂湯主之其血當下

水有清濁。清則入經。化而爲溺。則爲溺。爲唾。苟因氣化之亂。濁者入之。則不能化。而爲血。害也。水性惟能潤下。下流不通。入與血居。必停於脈。隨其所止。止於肌表者。作身腫。止於筋骨者。作肢節腫。此止於血室。故作少腹如敦狀。然血室雖與膀胱異道。膀胱是行水之府。水畜血室。氣有相感。故膀胱之氣亦不化。而小便微難。水與血皆陰類。雖有留積。不能發熱。故不渴。若渴。則爲膀胱結熱。而非水血矣。若小便自如。而少腹之如敦者。亦不謂之水。

併當是他邪血積可知矣。生後者言曾生育過之婦。則有此患。非指產後而言。若室女則無是疾也。用甘遂取其直達水停之處。大黃蕩滌瘀血。阿膠爲血室之向道也。

婦人經水不利下。抵當湯主之。亦治男子膀胱滿急有瘀血者。

傷寒陽明證。其人喜忘者。必有瘀血。大便色黑。抵當湯主之。發熱下之不解。六七日不大便者。有瘀血。亦抵當湯主之。傷寒有熱。少腹滿。應小便不利。

今反利者爲有血也。宜抵當丸。三者有病證而後立。方今止云經水不利。然經水不利。豈盡血畜不通。而無虛損者哉。此必有畜血形狀而出。是方也。婦人經水閉。不利。藏堅癖。不止。中有乾血。下白物。礬石丸主之。

子宮血積。不與氣和。故新血不至。遂成乾血。堅癖外連子戶。津液不行。化爲白物。是川綠礬消堅癖。破乾血。杏仁利氣開閉。潤藏之燥。蜜以佐之。內子戶而藥氣可直達於子宮矣。設乾血在衝任之海。

者必服藥下之內之不能去也。

婦人腹中諸疾痛常歸芍藥散主之。

此腹痛者由中氣虛脾土不能升運陰陽致二氣乖離肝木乘尅而作痛故用是湯補中伐木通行陰陽也。

婦人腹中痛小建中湯主之。

小建中專主風木勝脾之腹痛而婦人善怒易動肝火木邪乘土多有腹痛經水妄行之疾故以此湯主之。

帶下經水不利少腹滿痛經一月再見者土瓜根散主之。陰癰腫亦主之。

此亦因瘀血而病者。經水雖不利但一月再見之不同。皆衝任脈瘀血之病。土瓜根消水飲芍藥開血痺。桂枝通血脈。蠱蟲破血積。更需以酒行之。至於癰腫非惟男子之羣丸婦人之陰戶亦有之多。在產時瘀血流入作痛下墜出戶也。

問曰婦人年五十所病下利數十日不止暮即發熱少腹裏急腹滿手掌煩熱唇口乾燥何也。師曰此病

屬帶下何以故。曾經半產。瘀血在少腹不去。何以知之。其證脣口乾燥。故知之。當以溫經湯主之。亦主婦人少腹寒。久不受胎。兼治崩中去血。或月水來過多。及至期不來。

問下利不止。答屬帶下何也。婦人年已五十。經絕。胞門閉塞。衝任不復輸瀉之時。所積血自胞門化。爲帶下。無所從出。大便屬陰。故就大便爲下利。是卽以帶下例治之。

上節齋曰。婦人女子經脈不行。有脾胃損傷而致者。

不可便認作經閉血死。輕川通經破血之藥。遇有此證。便須審其脾胃何如。若因飲食勞倦損傷脾胃。少食惡食泄瀉疼痛。或因誤服汗下攻伐藥。傷其中氣。以致血少而不行者。只宜補養脾胃。用白朮爲君。茯苓芍藥爲臣。佐以黃耆甘草陳皮肉桂川芎歸身柴胡等藥。脾旺則能生血。而經自行矣。又有飲食積滯致損脾胃者。亦宜消積補脾。若脾胃無病。按其少腹果有血塊凝結。方宜香附蘼艾桂心桃仁行血通經等劑。

經云飲食入胃遊溢精氣上輸於脾脾氣散精上歸於肺通調水道下輸膀胱水精四布五經並行故心脾和平則經候如常苟或七情內傷六淫外侵飲食失節起居失宜脾胃虛損則月經不調矣若先期而至者有因肝脾血燥有因脾經鬱滯有因肝經怒火有因血分有熱有因勞役火動其過期而至者有因脾經血虛有因肝經血少有因氣虛血弱治法因肝脾血燥者加味逍遙散脾經鬱滯者歸脾湯肝經怒火者小柴胡加生地血分有熱者四物湯加白朮茯苓

苓柴胡丹皮勞役火動者補中益氣湯脾經血虛者
十全大補湯肝經血少者六味丸氣虛血弱者八珍
湯○經候不調無他證而不受胎六味丸全料減澤
瀉一兩加童便製香附四兩醋煮斷艾一兩調理最
妙若有別證兼見隨證制湯送下○婦人勞傷氣血
衝任虛損月水過多淋漓不斷或過期不來崩中下
血或白帶白淋四物湯加丁香膠艾若胃傷胎瘀血
停留小腹急痛五心煩熱者大溫經湯○月水不調
陰虛潮熱或寒熱如癰盜汗痰嗽漸成骨蒸者血熱

相搏也。加味逍遙散。○月水准信不受孕者。其故有三。肥白腹不痛者。閉子宮也。因痰導痰湯甚則間一二日送滾痰丸二三服。腹多痛者。必食生冷過多。且又多氣。宜溫熱藥。七氣湯如欬嗽形瘦色赤多火陰血虛者。不宜服。只以四物加陳皮香附肉桂作丸。亦行血少不能攝精者。十全大補湯兼寒金匱溫經湯。或曰經正而子宮寒者。非也。若子宮寒。其經必過期矣。豈有准信而曰寒乎。○黑瘦多火。人經少色深紫而不受孕者。爲胞血枯而精被燥也。四物換生地加

芩連○瘦弱而不能受孕。子宮無血。精氣不聚。故也。
十全大補之類。○經水不准。必不受胎。然參前受胎
者。有之。此是血熱。抑有參前落後。互兼者。將爲寒熱
並乎。大抵婦人受氣。則氣亂。經期亦亂。故調經以理
氣爲先。歸附丸。○氣盛者。宜抑氣以行血。血盛則氣
行矣。○經不調而血淡如水。宜補氣血。保元湯加芎
歸。肉桂。香附。腹痛加膠艾。延胡。虛加薑附。○經水有
先期而來者。多屬熱。其證有二。血熱者。腹多不痛。身
多熱。此火也。其色必紫。脈必洪數。四物湯中川芎減。

半易生地加條芩丹皮香附。虛熱者四物合保元。不
應加炮薑。宣連炒黑。香附乾嗽者。逍遙散。氣多血虛
者。腹必疼。藿香正氣散。加芎歸。香附。慎用涼藥。若婦
人年四十餘。經水每月二三至者。此少年恣意太過。
後必崩淋。○經水後期來者。多屬寒。其證有三。血虛
腹多不痛。微微身熱。間亦有痛者。乃空痛也。脈必大
而無力。或浮濇濡細。宜調氣生血。八物加香附。虛則
四物加參朮黃耆升麻陳皮。氣滯而虛者。四物加丹
皮香附。肥盛多痰。去地黃。再加橘半茯苓。血寒脈必

沉遲弦緊歸附丸過期色淡者瘀多也二陳加柴胡
香附肉桂若過期兼白帶者艾煎丸加香附若欬忌
香附逍遙散加丹皮嗽而瀉者養胃湯血滯滯者胸
飽腰腹痛醋煎散或七氣湯加減○衝任虛損少腹
有寒月水過期不能受孕者溫經湯○年老無病而
月水如期不斷者氣血有餘也若反多或一月兩至
者氣虛不能統血欲成崩淋也既絕復來者氣病也
或傷損或瘀血皆以脇腹急痛爲辨並宜四烏湯用
赤芍若其勢可止宜大劑八物湯能食者加苓連不

能食者加炮薑止之服藥得効者十有三三虛甚者
多不能効○經水將來腰疼腹痛乃鬱滯有瘀血四
物加紅花丹皮蓬朮延胡索香附木香實熱加黃連
發熱加柴芩將來小腹先痛氣血滯滯也四烏湯加
莪朮桃仁經前先腹痛脈浮弦者小建中加丹皮桃
仁經候欲行身體先痛氣血不足也桂枝湯加芍歸
稍用熟附二三分經後痛者雖曰虛寒當補然氣散
亦能作痛須視其受補否不受補四物加炮薑艾附
受補者八物加炮薑艾附瀉者先治瀉又有經行四

五日腹中綿綿作痛者此經行時因氣滯而止未盡故也。四烏湯加木香蓬朮砂仁。每遇經行輒頭疼氣滿心下怔忡飲食減少肌膚不澤此痰溼爲患也。二陳加當歸炮薑肉桂。經水愆期胸脇腰腹刺痛虛浮寒戰此衝任衰弱藏氣虛冷故也。溫經湯加減。一切氣上湊心心腹攻築脇肋刺痛月水不調者用香附三錢烏藥一錢陳皮蘇葉各六分乾薑四五分煎服。經水有紫黑色腹痛者乃氣血相併也腹不痛者血熱也淡紅色者血虛也其來必皆不准腹

痛者四烏湯加蓬朮川連。不痛者但加川連。色淡者增損四物湯。○色如黃漿水。心胸嘈雜汪洋。乃胃中有溼痰也。六君子加肉桂木香蒼朮。經下利若汗出。小便利者。爲亡津液。故經水反少。補脾和胃。血自生矣。經行之際。禁用苦寒辛散之藥。飲食亦然。○經水不止。如左尺按之空虛。是氣血俱脫。輕手其脈數疾。舉之弦緊或滿。此是陽脫陰亡。或見熱證於口眼鼻或渴。是名陰躁。陽欲先去也。急用大建中湯。或十全大補送腎氣丸。以補命門之下脫。○痰多。占佳血。

海因而下多者。目必漸昏。肥人多此。南星、蒼朮、川芎、
香附作丸服。○肥人不及日數而多者。痰多、血虛、有
熱。亦用前丸。更加黃連、白朮。○肥盛飲食過度而經
水不調者。乃是壓痰。宜蒼朮半、夏、茯苓、白朮、香附、澤
瀉、芎歸。○軀脂滿而經閉者。以導痰湯加川連、川芎。
不可服四物。以地黃泥隔故也。○血枯經閉。四物加
參、耆、肉桂。切禁桃仁、紅花。因鬱火者。逍遙歸脾間服。
○陰虛經脈不通。小便瀉。身體疼痛。以四物倍芍藥。
加肉桂、丹皮、香附、甘草。○經行之際。與產後一般。將

理失宜爲病不淺若被驚則血氣錯亂漸止不行或逆於上而從口鼻中出或逆於身而爲血分勞瘵若其時勞力太過則生虛熱亦爲疼痛之根若鬱怒則氣逆氣逆則血滯於腰腿心腹背肋之間遇經行時則痛而重經過則安若怒極而傷於肝則又有目暈嘔吐之證加以血不循經遂成淋漓不止凡此之類感風則病風感冷則病冷久而不治崩漏帶下七癥八瘕皆從此而成矣

薛立齋治一婦腹內一塊不時上攻或痛作聲吞

酸痞悶。月經不調。小便不利。面黃。青黃相兼。已二
年餘。此肝脾氣滯。以六君子加芩歸柴胡炒川連
木香吳茱萸二劑。次與歸脾湯。下蘆薈丸。月餘。肝
脾和而諸證退。又與補中益氣加茯苓丹皮。中氣
健而經自調。

又治一中年婦。素性急。先因飲食難化。月經不調。
服理氣化痰藥。反肚膨脹。大便泄瀉。又加烏藥蓬
朮。肚腹愈脹。小便不利。加豬苓澤瀉。痰喘氣急。手
足厥冷。頭面肢體腫脹。指按沉而痛。脈沉細。右寸

爲甚此脾肺之氣虛寒不能通調水道下輸膀胱
滲泄之令不行生化之氣不運東垣所云水飲留
積若土之在雨中則爲泥矣得和風暖日水澤去
而陽化自然萬物生長喜其證脈相應遂與加減
腎氣丸小便即通數劑腫滿消半四肢漸溫自能
轉側又與六君子加木香肉桂炮薑而愈

崩漏○經云陰虛陽搏謂之崩又云陰絡傷則血內
溢又云脾統血肝藏血崩之爲患或脾胃虛損不能
攝血或肝經有火血熱妄行或怒動肝火血熱騰沸

或脾經鬱結血不歸經。或悲傷胞絡血崩下脫。治療之法。脾胃虛弱者。六君子加芍歸。柴胡。脾胃虛陷者。補中益氣加酒炒白芍。肝經血熱者。四物湯加柴胡。山梔。丹皮。肝經怒火。小柴胡加山梔。芍藥。丹皮。脾經鬱火。歸脾湯加山梔。故先哲云。凡下血證。須用四君子。收功。斯言厥有旨哉。若大脫血後。毋以脈診急用。獨參湯。加當歸救之。其發熱潮熱。欬嗽脈數。乃是元氣虛弱。假熱之脈也。尤當加用人參。此等證候。無不由脾胃先損而患。故脈洪大。察其中有胃氣。受補可。

救誤投寒涼之藥復傷脾胃生氣使血反不歸源也。
○暴崩下血不止者乃血不歸經陰血隨陽盛之勢。
妄行下漏也。身熱不痛者逍遙散加熟地川芎不應。
此血熱沸騰也。四物加苓連肉桂。○按東垣云。經漏。
不止有二。皆由脾胃有虧下陷於腎與相火相合。淫。
熱下迫。經漏不止其色紫黑如夏月腐肉之臭。中有。
白帶者脈必弦細寒伏於中也有赤帶者其脈洪數。
病熱明矣。必腰痛或臍下痛。臨經欲行先寒熱往來。
兩脇急縮兼脾胃證見或四肢困熱煩不得眠心中。

急補中益氣加茯苓芍藥大補脾胃而升降氣血。可
一服而愈。或先貴後賤。先富後貧。心氣不足。其火大
熾。旺於血脈之中。形質肌肉。顏色似不病者。此心病
也。經水不時而下。或適來適斷。暴下不止。治當先說
惡死之言。勸諭令懼死。而心不動。以補中益氣下安
神丸。補養脾胃。鎮墜心火。更以人參養營補陰制陽。
經自止矣。○暴崩下血。腹痛有二。有瘀血。有空痛。瘀
血者。體必作寒。脈必弦。如空痛者。不寒。少腹上喜熱。
按脈微弱。但瘀血當去。空痛當補。有因內傷。若小腹

不痛八物湯加苓連如痛者四烏湯加莪茂年高而崩者法在不治治亦無功○經候不調血氣成塊崩中下漏者此是血海虛寒外乘風冷搏結不散醋煎散加麝香血氣虛損或凝積塊七癥八瘕上則氣逆嘔吐下則泄下五色金匱溫經湯加薑桂以艾煎酒溫服血崩之人有服前藥不効者火也三補丸卽三黃丸去大黃用黃芩○風入胞門忽時崩下鮮血者一味防風丸金匱旋復花湯送下風熱入肝經崩下發熱手心灼熱者一味子芩丸小建中湯送下○崩

漏淋瀝衝任衰弱藏府虛冷故也千金茯苓補心湯
如小腹急痛兼下赤白帶者艾煎丸下血過多血
氣不足四肢倦怠乏力增損四物湯去血雖多間
有崩漏水下時有鮮血者四物加丁香膠艾香附丹
皮失血血崩白淋久經事來多者四物加參耆膠艾
椿根皮去血過多虛勞發熱有痰者補益氣加苓半
有熱少加芩連腹痛加烏藥桂心口乾去升麻加煨
葛根○東垣論崩漏並不言熱其主在寒即使有熱
證亦是虛熱若以寒藥治之即瘀血愈凝結經血愈

不止矣。四物加炮薑調理。因勞者用參耆帶升補藥。
○血崩甚而腹痛。人多疑惡血未盡。及見血色。愈信惡血之說。不敢使止。大凡血之爲患。欲出未出之際。停在腹中。卽成瘀色。未必盡爲瘀熱。又曷知瘀之不爲虛冷乎。若必待瘀血淨後止之。恐并其人而不存矣。且腹痛更有說。積而腹痛。血通則痛止。崩而腹痛。血住則痛止。○千金治崩淋帶下。五崩熱病下血。寒熱下血。經行犯房室。下血經來。舉重傷任脈。下血產後。藏開經利。下血外實內虛之病。用小牛角腮。

散若崩中去血不斷本方去禹餘糧乾薑烏鯁骨龍
骨赤小豆加甘草地榆小蘗根丹參乾地黄芎藭亦
石脂龜甲栝子仁各角腮鹿茸散○積冷崩中去血
不止腰背痛四肢沉重虛極小牛角腮散去鹿茸阿
膠烏鯁骨赤小豆加乾地黄桑耳白朮赤石脂礬石
附子人參蒲黃防風名大牛角腮散○崩中去赤白
或如豆汁千金伏龍肝湯○膀胱虛傷不能攝血而
崩下不止者單方用新絲綿燒灰爲末空心酒調一
錢或雞子黃蘸食數日必効○崩血經年不止者用

香附二兩炒黑蓮房五枚燒存性爲細末空心陳酒調下二錢或用陳棕爛燒灰存性黑糖調酒下一錢卽止此切法也○崩漏過多服補瀉藥皆不効者用黃牛角鯁煨存性空心酒服二三錢虛寒血色稀淡者同鹿茸煨服尤効蓋牛屬坤土益脾角鯁走肝主血神農本草經云下閉血瘀血補女人帶下血崩燔之酒服宗奭曰燒灰主婦人血崩大便下血血痢虛人獨參保元皆可送下此血脫益氣之良法也古方有用白馬蹄燒灰存性酒服方寸匙者有用桑樹上耳

燒灰酒服者皆千金法也。又用五靈脂生炒各半酒服者此大傷中氣雖蔡華亦難輕試。○崩證多用醋炒。升麻醋能收斂故也。○血崩日久純下臭黃水或帶紫黑筋塊腥穢不堪者不治。腹滿不能飲食不受參朮補益者不治。服大劑補中人參每日服至兩許不應反加寒熱口燥面目足脛浮腫者不治。瘀汚崩脫少腹不疼後變陰戶腫痛如刀割者死。期迫矣。

診○漏下赤白日久下血數升脈急疾者死遲者生漏

下赤白不止。脈小虛滑者生。數盛者死。漏下脈弦勁
者死。瀉瀉不調。按之不來者死。下血脈虛者。脈浮者
俱不治。然峻實其下。亦有得生者。寸口脈遲爲寒在
上焦。則吐血衄血。尺脈微遲爲寒在下焦。則崩血便
血。大抵數小爲順。洪大爲逆。大法當調補脾胃爲主。
薛立齋治一婦人。久患血崩。肢體消瘦。飲食到口。但
聞腥臊。口出津液。強食少許。腹中作脹。此血枯之
證。用八珍湯。四烏鯁骨一蘆茹丸。兼服兩月。經行
而愈。

一婦老年患崩。諸藥罔效。身熱皮痛。頭暈。涕血。咳嗽。少食。衆作火治。轉致絕粒。數日僅存。呼吸。診之。乃脾腎虛寒。用生料八味丸一劑。翌早遂索粥。再劑。熱減痛止。服八味丸愈。後因勞役憂怒。至夏崩復作。胸飽發熱。脊痛腰不可轉。神氣怫鬱。脈洪無倫。按之微弱。此無根之火。內真寒而外假熱也。以十全大補加附子一劑。暈止崩血漸減。日服八味丸而愈。

汪石山治一婦年逾四十。形色蒼紫。忽病血崩。醫

者或用涼血。或用止瀉。俱罔効。診之六脈皆沉澹。而緩。按之無力。乃胃病。非血病也。當用甘溫之劑。健脾胃。胃使胃氣上騰。血循經絡。則無復崩矣。遂用補中益氣。多加參耆。兼服參苓白朮散而愈。

失血心痛。婦人血崩而心痛甚。名曰失血心痛。心主血。心脾血虛。無以榮養。故痛如刀刺。崩甚則痛甚。崩緩則痛緩。若小赤去血過多而心痛甚者。亦然。若小腹喜按而下淡色血水爲陰血耗散。先用烏鰂骨炒爲末。醋湯調下收斂之。次與補中益氣湯升舉之。

若小腹中有塊而按之作痛。血色紅紫中有結塊。爲瘀血不散。先用失笑散。後與十全大補。峻補之。若心脾血弱。或鬱結傷血。用歸脾湯調補之。

經閉不行。經水陰血也。爲衝任二脈上爲乳汁。下爲血水。其爲患。有因脾虛不能生血。或鬱結傷脾而血損者。有因胃火而血燥者。有因勞傷心神而血耗者。有因積怒傷肝而血閉者。有因腎水不能生肝而血少者。有因肺氣虛傷不能統血而經不行者。治療之法。損其肺者益其氣。損其心者調其營衛。損其脾

胃者調其飲食適其寒溫損其肝者緩其中損其腎者益其精。審而治之庶無誤矣。○室女婦人諸病以調經爲先。調經以理氣爲要。蓋氣不和則血不流。故經閉然其證不一。小腹疼痛血海虛寒也。或潮熱頭目昏沉肢體勞倦五心煩熱怔忡面赤口燥唇裂盜汗身疼者血氣虛損也。並宜溫經湯。腹中結塊腰腿重痛及少腹痛如錐刺者瘀血凝滯也。四物加肉桂蓬朮。貌本壯實飲食減少者胃氣不調也。蓋胃氣不和亦令經水不調。逍遙散下。附九。○經水三月不

至其脈右浮大而左反弱其經當下此爲居經非妊也。當抑氣養血。又經水絕後一朝而圓血二三日不止者不須治。當自止。經水常五日至者五日愈。下利而經斷者利止自來。蓋下利則亡津液。故經絕利止。津液復。經當自下。若脈微濇者。雖二三月不行。非胎。當養血。經自行。以脈濇故知非胎也。經水不通而逆行者。或吐血。或衄血。或唾血。或血腥。通宜四物加韭汁童便。甚則從虛勞例用巽順丸。烏骨雞丸治之。室女經水既來而復不通。其說有三。面色不黃。

飲食如故。身不熱者。名歇。非病也。不須藥。面黃肌瘦。身熱爲虛勞。診其肝脈弦出寸口。魚際。非藥所能治。急與婚配。自然經行而愈。藥則加味逍遙散。乾欬用蜜製白朮。橘皮。生薑。又有氣血不足。面黃肌瘦。身熱不甚者。不可用桃仁紅花通血藥。宜六味丸。去山茱萸。加麥門冬。兼進異功散。調補之。婦人經閉不通。視其脈不足。當補氣血。四物湯加參。耆。朮。草之類。脈有餘而氣相併者。四烏湯加肉桂。橘皮之類。婦人經候漸少。以致不通。手足骨節煩疼。日漸羸瘦而生。

潮熱其脈微數。此陰虛而弱。陽往乘之。當養血益陰。慎勿以毒藥攻之。○女人虛羸。有鬼胎。癥塊經候不通等證。當隨證辨治。丹方有服芫花下黑物而効者。苟非實證。未可輕試也。○婦人月經不利。臍下氣脹。上攻欲嘔。不得吐。加減四物湯。或用當歸身一兩。穿山甲炒。蒲黃各五錢。辰砂一錢。麝香少許。共爲細末。食前熱酒調下二錢。○婦女骨蒸痰嗽。診其脈七八至。或細而數。視其肌肉消瘦之極。而反嬌赤者。此必死候。更加泄瀉喘逆。不能右卧者。死期尤促。若室女

經水不調。尤當開鬱爲主。室女年及笄。天癸不至。面色不黃。飲食如故。此名石女。不在經閉論。亦有至十七八而經自來者。婦人經閉。肥白者多痰。去痰經自行。二陳加芎歸川連。南星枳實生薑竹瀝。稟厚恣於酒食者。平胃散加薑汁炒川連。歸尾半夏薑汁。黑瘦者多血枯。四物加參耆香附丹皮。經閉脈沉弱。少腹痛。屬寒結。四烏湯。芍藥用桂酒製。烏藥用附子製。寡婦尼姑。經閉鬱也。加味逍遙散。加無灰酒竹瀝。娼妓本無經閉之理。間或有之。勞也。十全大

補中肉桂可用二三錢。血枯一證與血隔相似。皆經閉不通之候。然而枯之與隔。則相友有如冰炭。夫枯者。枯竭之謂。血虛之極也。隔者。阻隔之謂。血本不虛。而或氣或寒或積有所逆也。病發於暫。其證或痛或實。通之則血行而愈。可攻者也。枯者。其來也漸。衝任內竭。其證無形。必不可通者也。嘗見今人之於此。證聽其言。則明日血枯經閉。察其治。則每用四物桃仁紅花。甚至硝朴稜莪之類。無所不至。夫血既枯矣。只當補養陰氣。使其血充。則弗招自至。奚俟通也。若

勉強逼之則枯之愈枯不死何待。或問一婦哮喘發後必便血二三日其喘方止每歲常十餘發無不皆然。經閉數年不通而不成虛勞之病何也。答曰此肺移熱於大腸。熱得下泄故喘嗽止。經血從大便間道而出。雖閉而無留結之患。故不成勞。

診。凡經閉不調與胎產之病其脈要滑實重按有力崩漏不止與產後之病其脈要虛濡小弱留連調經及安胎雖以順氣為主又須補脾爲要治崩及產後雖以散血爲先又當扶脾爲本。

喻嘉言治楊季登女經閉年餘發熱少食肌削多汗而成勞快醫見汗多誤爲虛也投以參朮其血愈稠診時見汗出如蒸籠氣不謂曰此證可療處全在有汗蓋經血內閉止有從皮毛間透出一路以汗卽血之液也設無汗而血不流則皮毛槁而死矣宜用極苦之藥斂血入內而下通於衝脈則熱退經行而汗自止非補藥所能効也於是以龍薈丸日進三次月餘經血畧至汗熱稍輕姑減前丸只日進一次又一月經血大行淋漓五日而諸

證全瘳矣

帶下○帶下之證起於風氣寒熱所傷入於胞宮從
帶脈而下故名爲帶有五色不只赤白白帶者屬氣
虛甚則腰痛如虛不甚則不痛若氣鬱甚則腰痛頭
疼眼花此虛證也千金內補當歸建中湯加醋製香
附或革薢分清飲量肥瘠選用○赤帶多腰痛艾煎
丸加續斷杜仲若肥盛蒼黑而肌肉胕堅者爲溼熱
下注平胃散加薑製星牛酒炒芩連○赤白帶下艾
煎丸隨證加氣血藥治之○五色帶下十全大補湯

加熟附龍骨赤石脂禹餘糧酒丸服。○或因六淫七情或因醉飽房勞或因膏粱厚味或服燥劑所致脾胃虧損陽氣下陷或溼痰下注蘊積而成皆當壯脾胃升陽氣爲主佐以各經見證之藥陽氣下陷補中益氣湯溼熱下注加苓半蒼朮黃蘗氣虛痰飲下注局方七氣湯送腎氣丸。○丹溪云帶下赤白屬於大腸小腸之分赤屬血白屬氣主治燥溼爲先補與帶俱是胃中痰積流下滲入膀胱無人知此只宜升提甚者必用此以升提其氣次用二陳湯加二朮升柴

丸服○肥人多是溼痰越鞠丸加滑石海石蛤粉星
半茯苓椿皮作丸服○瘦人多是熱以大補丸加滑
石海石椿皮龜版灰作丸服必須斷厚味○帶下脈
滑惡寒腥臭不可近者難治

遺濁○小便白淫白濁皆由勞傷於腎故心腎不交
泰水火不升降腎主水開竅在陰陰爲便溲之道胞
冷腎損故有淫濁之證白淫者或一時放白水嬌尼
多有此疾乃鬱火也逍遙散加炒黑山梔酒炒黃蘗
白濁者渾濁如膿此膀胱經熱失治當生癰疽清心

蓮子飲加草薢

淋瀝○經水淋瀝不斷其故有三有因月戒來而行房致傷胞絡先服活血藥小腹痛者四物加香附烏藥不痛四物加膠艾黃耆氣虛下陷小腹喜溫按者四物加參朮黃耆升麻陳皮有多氣所致者甚則胸膈飽悶肚腹疼痛用正氣散若肚腹不疼者逍遙散加熟地當臍痛者尤宜飲食少者增損四物湯加焦白朮禁用芩連若勞傷氣血衝任虛損四物加丁香膠艾小腹急痛溫經湯月水至老不降必成淋證補

中益氣或八珍並加香附細辛仍須戒氣方可治療
否則崩淋難治也

淋辨○淋證皆由腎虛膀胱積熱所致腎虛則小便
數膀胱熱則小便濇適遇經行時候或濇數淋漓腹
中時痛其脈沉細皆因寒熱邪氣客於胞中故衝任
不調而成此證宜服歸附丸○白淋者起於鬱多屬
虛寒小腹不疼與去而過多空痛者俱宜人參養營
湯香附不可缺或補中益氣湯下歸附丸如痛者四
烏湯白淋變爲黃水將成血淋八物湯加減○血淋

者月事三五日一至。積數月不愈者是也。腹痛則四
烏湯加莪朮木香。甚則醋煎散。尚恐有瘀血未盡也。
去多不痛。善飲食者。八物湯加芩連。或補中益氣加
黃藥。如飲食少進者。芩連黃藥禁用。若少腹痛而脾
胃不實。或痛而欲得按者。八珍湯加膠艾。或逍遙散
加熟地膠艾。如瀉者。先實脾胃。大抵治淋。先治脾胃。
爲上。此證多腰痛。雖屬血。亦因氣所致也。沙淋者。
淋下則沉積如沙。一層有赤白二種。白屬氣。赤屬血。
不可依書用芩連。多不克効。當知婦人之疾。雖有淫。

熱止宜調經。不可與苦寒之藥。以其月事時下多虛少實。故養營湯治白淋而効。以有桂也。艾煎丸亦然。以有艾也。惟赤淋不可服熱藥。艾煎丸亦禁用。宜八珍加芩連香附。誤用溫補。必致躁渴引飲。加以水飲停畜而成腫脹者。加味逍遙散加芩連枳朴澤瀉。梅皮先治其脹。然後徐徐治本。慎勿驟補。驟補則氣壅腹脹也。年老患血崩淋證。不拘痛與不痛。脾胃實與不實。皆以八珍加膠艾黃耆澤瀉。若遽用芩連。以傷脾胃。更何恃以祛病乎。

泄瀉。經行時先泄瀉者此脾虛也。脾統血而惡溼。經水將動脾血先注血海。然後下流爲經。脾血既虧不能運行其溼。所以必先作瀉。補中益氣加炮薑。有熱兼黃連。若飲食減少六君理中選用。

石頑治一薛姓婦。每遇經行必先作瀉二三日。其脈古平。關尺弦細如絲。右手關上小駛而滑。服薑桂枝附則大瀉。腹稍泄瀉。轉劇。服苓澤車前之屬。則日略如常。此脾血虛寒而脾胃有伏火也。俟經將行作瀉時。朝用理中加黃連。作湯服五六劑。暮

與加減八味加紫石英作丸常服不終劑而數年
之疾頓除

小便血。婦人尿血。或因膏深炙燐。或因醉飽入房。
或因飲食勞役。或因六淫七情。以致元氣虧損。不能
收攝歸源。若因怒動肝火者。加味逍遙散。調送髮灰。
肝經風熱者。送一味子芩丸。久而血虛者。八珍湯送。
髮灰。膏梁積熱者。清胃散加槐花甘草。房勞所傷者。
六君子加升柴。風熱所傷者。四君子加防風。凡久而
虧損元氣者。補中益氣爲主。鬱結傷脾者。歸脾湯爲

主。

師尼寡婦寒熱。療師尼寡婦宜別製方藥。謂獨陰無陽。致血氣交爭。寒熱如瘧。或腰背作痛。而寒熱經閉。白淫痞悶。欬逆而黧瘦削。久則成勞。其肝脈弦出寸口上魚際。是其證也。若室女出嫁愆期而寒熱。或既嫁不得於夫者。亦然。蓋男子精盛則思。室女子血盛以懷胎。此天地自然之理也。治宜開鬱理氣。其經自調。逍遙散加無灰酒。竹瀝名酒。瀝湯專主尼寡寒熱。肥人用越鞠合二陳散。宜苦兼怒動肝火而發熱。

佐以小柴胡加減。若兼鬱結傷脾而寒熱。佐以歸脾湯。此證多兼經候不調。當審緩急治之。婦人形瘦肉脫。胸中常想著一事。而百計不解者。勿與醫治。後必成癲。凡婦人鬱怒發寒熱逍遙散。加丹皮香附。脾氣不運。痰氣留著。結爲痰癖。發則其塊上升。氣逆喘促。嘔吐酸水。初起元氣未傷者。四七湯加枳實黃連。虛人香砂六君加柴胡白芍。下虛金匱大抵鬱證皆虛火用事。故多骨蒸寒熱。經閉不調。喘嗽失音等證。當詳虛損例治。但須兼調鬱氣。亦有陰血虧損不

勝香燥者。惟降火滋陰爲首務耳。

千金云。凡人無子。當爲夫妻俱有五勞七傷。虛羸百病所致。故有絕嗣之患。夫治之之法。男服七子散。女服紫石門。冬圓無不有子也。若丈夫陽氣不足。不能施化。慶雲散主之。婦人立身以來。全不產。及斷緒後。十年二十年不產。此胞門不淨。中有瘀積結滯也。朴硝鹽胞湯主之。婦人月水不利。閉塞絕產者。白薇圓主之。

子嗣。子嗣一門。古方悉用辛熱壯火之劑。若施之。

於氣虛精寒之人。固所宜然。設藥用於火旺精傷者。得不愈。伐其陰乎。竊謂男子之艱於嗣者。一如婦人經病調理。然有不生不育之不同。大意在於補偏救弊。往往有體肥質實。偏生無子者。豈可一藥歸於虛寒耶。蓋溼勝則氣滯。氣滯則精雖至而不能衝透子宮。故爾不能成孕。惟宜行溼耗氣。助其流動之步。如二陳二妙七氣平胃之屬。皆可選用。甚則控涎丹先行嚮導。最爲要訣。慎勿拘於世俗溫補壯陽之說也。且人之所稟不同。勇怯各異。有因男子真火式微者。

有因溼熱傷精者有因婦人胞門澇膩者有因血海
虛寒者有因子宮枯燥者至如生而不育亦自不同
有金石藥毒伏於髓中者有酒客溼熱混於髓內者
有慾勤精薄者有得胎後不戒房室頻泄母氣者有
妊娠不慎起居而致胎病不育者有男子精髓雖衝
而督脈氣衰陽氣不振但生女不生男者此豈一法
所可治乎歷檢古方中惟葆真丸千金種子丹五子
衍宗丸等方治男子陽道不振精氣寒薄與夫斷喪
太過及年老無子者咸爲得宜若精髓虛薄陽氣不

固聚精丸最佳。陽衰更加人參、鹿茸尤妙。生女不生男者，當大補督脈，益陽氣。鹿茸四具，人參一觔，遠志四兩，醇酒丸服。其有膏粱富貴，飽飫肥甘，恣情房室，氣竭精陽，不能生子者，但服煉真丹，勿令斷絕。雖在老耄之年，每多生育，然非素享醲厚，形體豐盛，人服之無損也。至於婦人子宮諸證，當詳經帶例治。俟經止無病，隨其虛實寒熱調理，自然生育。大率婦人肥盛者多不能孕，以中有脂膜閉塞子宮也。雖經事不調，當與越鞠二陳抑氣養胃之類，有熱隨證加黃連。

枳實。瘦弱不能孕者。以子宮無血。精氣不聚故也。當
與四君六味加斷艾香附調之。子戶虛寒不攝精者。
秦桂丸最當。婦人多有氣鬱不調。兼子藏不淨者。加
味香附丸。男服聚精丸。若因瘀積胞門。子宮不淨。或
經閉不通。或崩中不止。寒熱體虛而不孕者。局方續
血丸爲專藥。若帶下少腹不和。或時作痛者。千金大
黃丸。蕩滌之。子戶虛熱。雖結而不能成實者。四物換
生地加苓連然。此皆由氣血偏沮。是可以藥奏功。若
夫稟賦陰陽偏絕。雖日用參朮峻補。終無利天之力。

也○丹溪曰無子之因多起於父氣之不足豈可獨
歸罪於母血之虛寒况母之血病矣止虛與寒而已
哉然古方治婦人無子惟秦桂丸一方其性熱其辭
確今欲得子者率皆服之無疑夫求子於陰血何至
輕用熱劑耶今得此丸經血必轉紫黑漸成衰少或
先或後始則飲食驟進久則口苦舌乾陰陽不平血
氣不和焉能成胎縱使有成子亦多病以其能損真
陰也按東垣云李和叔中年得一子至一歲身生紅
絲瘤而死後三四子至三歲皆病瘤而死乃腎中伏

火精氣中多有紅線以氣相傳生子故有此疾俗名胎瘤是也。遂以滋腎丸數服以瀉腎中火邪補真陰不足忌酒辛熱之物其妻用六味地黃丸以養陰血。受胎五月之後以黃芩白朮二味作散服後生子至三歲前證不復作矣。

胎教○胎教之說世都未諳妊娠能遵而行之不特無產難之虞且生子鮮胎毒傷天之患誠爲廣嗣要旨姑以大槩陳之婦人經後四十餘日不轉卽謹房室慎起居薄滋味養性情刻刻存心與執持寶玉無

異舉趾必徐行立勿仰坐不實其前陰卧不久偏一
側不得耽坐嗜卧使氣血凝滯爲第一義雖不可負
重作勞然須時時小役四體則經絡流動胎息易於
動運腰腹漸粗飲食不宜過飽茶湯更須節省大熱
大涼總非所宜犬羊蟹鼈等一切有毒之物固宜切
禁卽椒薑常用之品亦須少嘗其豕肉醇酒淫麪之
類縱不能屏絕不食亦不可恣啖歸精於胎過於養
長致母臨蓐難產而子在胞中稟質肥脆懨懨必多
羸困卽如沃壤之草木移殖於瘠壤得不利委乎

甫交三月卽當滿。裹其腹胎氣漸長。僅可微鬆。其束切勿因其氣急滿悶而頓放之。在夏澡洗須避熱湯。冬時寤寐勿迫爐炭。其最甚者尤在不節交合。淫火盡歸其子。以釀痘疹疥癩之毒。然妊娠稟性安靜。不似強爲。方遵實濟。若強制以違其性。則鬱火彌熾。此與恣情無禁者雖截然兩途。而無歸胎息則一。嘗見有切於求嗣者。得孕卽分處房幃。而子必歿於痘。豈非強制其火。彌熾之明驗乎。蓋人之志欲匪一。苟未能超出尋常。又須曲體母情。適其自然之性。使子

氣安和。是卽所謂胎教也。當知胎教原非一端。若懷
子受驚。則子多胎驚。懷子抱鬱。則子多結核。流注懷
子恐懼。則子多癩癩。懷子常起貪妄之念。則子多貪
。懷子常挾憤怒之心。則子多暴狠。懷子常造綺語
。則子多詐僞。非但懷子之後當檢束身心。而經
前多過愆。毋恣肆以遺胎息之患。若大醉後媾精。精
中多著酒淫。則子多不育。大怒後媾精。精中多挾怒
火。卽子多乖戾。大勞後媾精。精中不滿真氣。則子多
孱弱。若夫熱藥助戰。作意必精。精中流行火性。則子

多異疾。至於風雨雷電。精感觸震氣。則子冬。合類
以此言之。則三元五臘。宜確遵禁戒。誕育自是不凡。
宗光重務。安得視爲嬉戲哉。

胎前

經云。何以知懷子之且生。身有病而無邪脈也。○人有重身。九月而瘖。此胞絡之脈絕也。胞絡者。繫於腎。少陰之脈。貫腎。繫舌本。故不能言。無治也。當十月復。○婦人重身。毒之何如。曰。有故無殞。亦無殞也。言有是病而用是藥。藥雖峻克。可無傷於胎息也。金匱云。師曰。婦人得平脈。陰脈小弱。其人渴不能食。無寒熱。名妊娠。桂枝湯主之。於法六十日。當有此證。設有醫治逆者。却一月加吐下者。則絕之。

平脈者言其無病之脈也。惟陰脈小弱以其營氣不足耳。凡感邪而營氣不足者則必惡寒發熱。今無寒熱妨於食是知妊娠矣。妊娠血聚氣搏經水不行至六十日始凝成胎。斯時營氣并於胎元而血氣不足津液少布故其人渴不能食宜桂枝湯和營益胃設有醫以他治反加吐下者此爲惡阻則絕之謂絕止醫治候其自安不可用藥更傷其胃氣也。婁全善云嘗治一婦惡阻經水愈治愈逆因思仲景絕之之旨遂停藥月餘自安。

婦人宿有癥病。經斷未及三月。而得漏下不止。胎動在臍上者。爲癥瘕害妊娠。六月動者。前三月經水利時。胎也。下血者。後斷三月。血也。所以血不止者。其癥不去故也。當下其癥。桂心茯苓圓主之。

宿有癥瘕。謂婦人行經時遇冷。則餘血留而爲癥。然癥病婦人恆有之。或不礙子宮。則仍行經而受孕。雖得血聚成胎。胎成三月。而經始斷。斷未三月。而癥病復動。遂漏下不止。癥在下。迫其胎。故曰癥瘕害。所以臍上升動不安。詢爲眞胎無疑。若是鬼

胎。卽屬陰氣結聚。斷無動於陽位之理。今動在於臍上。是胎已六月。知前三月經水雖利。而胎已成。後三月經斷。而血積成。卽是以血下不止。故用桂心。茯苓。丹皮。桃仁。以散其瘀。芍藥。以護其營。則血方止。而胎得安。世本作桂枝。茯苓。圓。乃傳寫之誤。詳桂枝氣味俱薄。僅堪走表。必取肉桂之心。方有去瘀之功。安常所謂桂不傷胎。勿疑有礙於妊。觀下條子藏。開用附子湯。轉胞用腎氣丸。俱用桂附。內經所謂有故無殞。是也。

婦人懷妊六七月脈弦發熱其胎愈脹腹痛惡寒者少腹如扇所以然者子藏開故也當以附子湯溫其藏。

妊娠脈弦爲虛寒。虛陽散外故發熱陰寒內逆故胎脹腹痛惡寒者其內無陽子藏不能司閉藏之令故陰中覺寒氣習習如扇也。用附子湯以溫其藏則胎自安。世人皆以附子爲墮胎百藥長仲景獨用以爲安胎聖藥非神而明之莫敢輕試也。

師曰婦人有漏下者有半產後因續下血都不絕者。

有妊娠下血者。假令妊娠腹中痛。爲胞阻。膠艾湯主之。

行經與結胎。皆屬衝任。衝任雖持平。陰陽交合。爲肝腎之用事。然長養成胎。皆坤上所資。蓋陰陽抱負。則不泄。坤土隄防。則不漏。若宿有瘀濁。客於衝任。則陰自結。不得與陽交合。故有時漏下。半產不絕也。凡妊娠胎氣。陽精內成。陰血外養。今陰血自結。與胎阻隔。不得相和。獨陰在內。作腹中痛。下血皆陰陽失於抱負。坤上失於隄防。此方皆治之。芎

歸宣通其陽血。芍地宣通其陰血。阿膠血肉之質。同類者以養之。甘草緩中解急。北方調經止漏。安胎養血。然加減又必從宜。若脈遲緩陰勝於陽。則加乾薑。或見數大陽勝於陰。則加黃芩。可不言而喻矣。

婦人懷娠腹中疝痛。當歸芍藥散主之。

此與胞阻痛者不同。因脾土爲木邪所剋。殺氣不舉。溼淫下流。以滯陰血而痛。故君以芍藥瀉肝利滯。佐以芎歸補血止痛。苓澤滲溼益脾。則知內外。

六淫皆能傷胎成痛不獨溼也。

如娠嘔吐不止。乾薑人參半夏丸主之。

此卽後世所謂惡阻病也。先因脾胃虛弱。津液留停。畜爲痰飲。至妊二月之後。濁陰上衝。中焦不勝。其逆痰飲。遂湧中寒。乃起。故用乾薑止寒。人參補虛。半夏生薑治痰散逆也。

妊娠小便難。飲食如故。當歸貝母苦參丸主之。

此小便難者。膀胱熱鬱。氣結成燥。病在下焦。所以飲食如故。用當歸以和血潤燥。貝母以清肺開鬱。

苦參以利竅逐水並入膀胱以除熱結也。

妊娠有水氣身重小便不利洒淅惡寒起卽頭眩葵子茯苓散主之。小便利則愈。

膀胱者內爲胞室主藏津液氣化出溺外利經脈。上行至頭爲諸陽之表。今膀胱氣不化水溺不得出外不利經脈所以身重洒淅惡寒起卽頭眩但利小便則水去而經氣行表病自愈。用葵子直入膀胱以利癰閉佐茯苓以滲水道也。

婦人妊娠宜常服當歸散主之。常服卽易產胎無疾。

苦。產後百病悉主之。

內經曰。陰搏陽別。謂之有子。尺脈搏擊者。由子宮之氣血相搏。而形於脈也。故妊娠之血。不可以靜。靜則凝泣。虧少則虛。皆不能與化胎之火相合。要其胎孕生化。必先和其陰陽。利其氣血。常服養胎之藥。非惟安胎易產。且免胎後諸患。芎歸芍藥之安胎補血。白朮之補胃養胎。其胎外之血。因寒滯者。皆解之。黃芩化壯火而生氣。故爲常服之劑。然當以脈證虛實加減。有病則服。否則不必也。

妊娠養胎白朮散主之。但苦痛加芍藥。心下毒痛。倍加芍藥。心煩吐痛。不能食飲。加糾辛一兩。半夏大者二十枚。服之後。更以醋漿水服之。若嘔。以醋漿水服之。復不解者。小麥汁服之。已後渴者。大麥粥服之。病雖愈。服之勿置。

本方四味。本草皆謂能去惡血。而養胎用之何也。蓋血聚而後成胎。少過邪。則所聚之血。將宿而不運。反類惡血。必開陳。然後胎可安也。養胎不惟在血。而胎係於腎。養之又在於胃。所以補腎調胃以

固精和中。用白朮調胃。秦椒開痺。痺開則陽精至。牡蠣治崩。崩止則陰精固。川芎下入血海。運動胎血。破舊生新。或陰血不利。肝木爲害。在內抑屈而痛者。瀉以芍藥之酸。寒以通其陰。設直衝過而痛者。散以芫薺之辛。溫以通其陽。或挾痰惡之氣上逆於胃。而胃中吐煩不能食者。用細辛溫中去痰下氣。半夏治心下急痛。和胃進食。止吐逆。若嘔而不止者。由肝木妄動。用小麥飲養其本氣。以安之。大麥主消渴。益氣調中。故中氣不足而渴者用之。

問曰婦人病飲食如故煩熱不得卧而反倚息者何也師曰此名轉胞不得溺也以胞系了戾故致此病但利小便則愈宜腎氣丸主之

此方在虛勞中治腰痛小腹拘急小便不利此治腎虛轉胞不得溺皆用此利小便也轉胞之病爲胞居膀胱之室內因下焦氣衰水滯在中不得氣化而出遂致鼓急其胞因轉筋不止了戾其溺之系水旣不出經氣遂逆上衝於肺故煩熱不得卧而倚息也用此補腎則氣化水行滲去而胞不轉

胎自安矣。雖然轉胞之病。豈盡由下焦腎虛所致耶。或中焦氣虛。土溼下干。害其胞。與上焦肺氣壅塞。不化於下焦。或胎重壓其胞。或忍溺入房者。皆足以成此病。必各求其所因以治之。

脈辨○婦人經水二三月不來。診其脈微滑而數。畧無間斷於其間。雖身有病而無邪脈。不瀉不伏不弦。勁卽胎脈也。辨男女法。古人咸以左大爲男。右大爲女。然多有素稟偏大偏小者。惟寸口滑實爲男。尺中滑實爲女。最爲要訣。如兩寸俱滑實爲雙男。兩尺俱

滑實爲二女。右尺左寸俱滑實爲一男一女。此屢驗者。若脈沉細腹重而不時微痛。雖有形如抱甕狀。滿腹不動。但當臍下翁翁動。按之冰冷。又兩尺乍大乍小。乍有乍無。或浮或沉。或動或止。早暮不同者。乃鬼胎也。須連視三四日。乃見宜補氣活血。若脈來急如風雨。少停復來如初者。夜叉胎也。亦有關部微似雀啄之形者。又有大小不勻。而指下弦勁不和者。皆夜叉之兆也。若脈來沉細。腰腹痛。胎伏不動。或反覺上搶心悶絕。按之冰冷。卽非好胎。更察舌紋青色。此胎

已死也。若并脣亦青。連母都不可救。但伏而不動者。亦有好胎。宜服順氣和血之藥。

驗胎。婦人經候不行已三月。欲驗有胎否。生川芎二錢。爲末。空心濃煎艾湯調下。腹內微動則胎也。

養胎。婦人受孕一月。足厥陰脈養其陰。陽新合名曰始胚。大集經云。胎成七日。初不增減。二七日如薄酪。三七日如生酪。四七日如熟酪。是也。二月足少陽脈養陰。陽居經名曰始膏。經謂五七日如生酥。六七日如息肉。七七日如段肉。八七日其堅如珎。是也。三

月手心主脈養初有定形名曰始胞經謂九七日變
五泡兩肘兩髀及頭十七日續生五泡兩手腕兩足
及頸十一七日復生二十六泡十手指十足指及眼
耳口鼻十二七日泡相成就是也四月手少陽脈養
始受水精以成血脈而形體成經謂十三七日現腹
相十四七日生五藏十五七日生大腸十六七日生
小腸是也五月足太陰脈養始受火精以成其氣而
肢節充經謂十七七日有脾處十八七日生三腕十
九七日生手掌足趺臂節二十七日生陰臍臍乳是

也。六月足陽明脈養始受金精以成其筋而骨幹立。經謂二十一七日有三百柔軟骨如初生瓠。二十二
七日如未熟瓠。二十三七日堅如胡桃。二十四七日
生一百筋是也。七月手太陰脈養始受木精以成其
骨而毛髮生。經謂二十五七日生七千脈尚未具成。
二十六七日成如藕絲。二十七七日有三百六十三
筋。二十八七日始生肌膚是也。八月手陽明脈養始
受土精以成膚革而藏府具。經謂二十九七日肌膚
稍厚。三十七日方有皮像。三十一七日皮轉厚堅。三

十二七日皮革轉成是也。九月足少陰脈養始受。精以成皮毛而穀氣入胃。石稟五氣之餘。藏府百骸俱實。故謂之石經。謂三十三七日耳鼻脣指膝節成。三十四七日生九十九萬毛髮孔。猶尚未成。三十五七日毛孔具足。三十六七日爪甲成。就是也。十月五藏俱備。六府齊通。納天地之氣於丹田。經謂三十七七日母腹中有風起。通其七竅。三十八七日隨其宿世善惡分香臭二種風。以定容貌骨節貴賤。右千金述徐之才養胎法。與大集經胎合。求其細則受胎在

母腹七日一變。展轉相成。然多有不足月產而能長育。長年者。此各經榮養與七日之變。皆不及期而養胎之氣仍周遍也。若經脈榮養未周。總屬半產非正產也。

惡阻。○經候不行。兩三月。精神如故。喜酸惡食。或嘔一物。或大吐。或時吐痰。與清水。肢體沉重。頭目昏眩。此名惡阻。不可作病治。四君子加烏藥。香附。橘皮。款而渴者。加橘紅。五味。生薑。若胸中憤悶。四肢沉重。怠惰。不能轉舒。惡聞食氣。喜臧。胎動不安。嘔逆不食。

者理中湯加茯苓木香半夏若中脘停痰二陳加枳
殼若飲食停滯香砂六君子加枳殼若脾胃虛弱異
功散兼氣惱加枳殼砂仁若飲食少思六君子加紫
蘇桔梗頭暈體倦六君子湯若嘔吐不食倍苓半夏
半夏乃健脾氣化痰溼之聖藥也今人以半夏有動
胎之性鮮有用之者以胎初結慮其辛散也妻全善
云余治妊娠阻病累用半夏未嘗動胎也千金用半
夏茯苓湯二劑次用茯苓丸○懷妊愛酸乃肝藏之
虛不能榮其肝肝虛故愛酸物○戴氏云惡阻者謂

婦人有妊惡心阻其飲食也肥者有痰二陳加枳木
瘦者有火異功加苓連

胎動○懷胎數動此胎氣熱所以逆上而作喘急也
急用條芩香附白朮之類腹中滿痛又心不得飲食
千金用黃芩白朮芍藥煎服令微下水則易生月飲
一劑爲善因惱怒而胎動不安者沉香降氣散或四
製香附一味爲君加歸身爲散鹽酒煎和滓服虛者
八珍去茯苓加黃芩紫蘇陳皮名安胎飲又氣虛少
食四君子加紫蘇陳皮血虛多熱四物加黃芩白朮

胎氣鬱滯紫蘇飲脾氣虛弱六君子鬱結傷脾歸脾湯鬱怒傷肝脾者四七湯加芎歸怒動肝火者小柴胡加木○安胎之法有二有因母病以致胎動者但治母病其胎自安八珍湯加膠艾黃耆氣滯者去茯苓加蘇橘黃芩因胎動而致母病者安胎而病自愈紫蘇飲加茯苓白朮阿膠砂仁千金治妊娠二三月至七八月胎動不安腰痛已有所見者用膠艾湯服之則安身有微熱去艾葉甘草加續斷葱白以葱能散客邪兼安胎也鄭虛菴曰治胎前下血不止用太

劑參朮以安胎。芎歸熟地黃。苓白芍阿膠以止血。砂
仁行氣以止痛。不可行動。但安卧養胎自愈。若傷動
胎氣。而下血不止。急用紫蘇飲。若胎未損。服之可安。
已損。服之可下。若純用四物湯。陰藥不得陽生。陰長
之功。非但胎不能安。每致腹痛。少食脾胃愈虛。而愈
不安矣。

漏胎下血。○妊娠經水壅之以養胎。畜之以爲乳。若
經水時下。此衝任氣虛。不能約制。而然。千金云。妊娠
血下不止。名曰漏胞。血盡則死。宜服乾薑。地黃散氣。

虛乏力少食者宜益氣固胎切勿泛用養血之劑四
君子去茯苓加膠艾芍歸黃耆砂仁若漏血腹痛者
芎歸人參阿膠大棗煎服若因鬱怒發熱內熱加味
逍遙散若血虛至夜發熱當歸補血湯勞動脾火加
味歸脾湯若因房事下血過多作痛八珍湯加膠艾
脾胃虛陷補中益氣倍升柴風熱加防風黃芩月數
將滿而漏血者此必不守禁忌所致亦有瘀血凝滯
不能轉運而下者氣血先傷後必難產宜服紫蘇飲
或用益母草熬膏肥人砂仁湯調下虛人人參湯調

下○妊娠三月其經月來三五次但不多飲食精神如故此血氣有餘兒大自不來矣若作漏胎治之其胎必墮○胎漏黃漿或如豆汁若肝脾溼熱用升陽除溼湯肝脾風熱加味逍遙散肝脾鬱結加味歸脾湯脾胃氣虛七味白朮散脾氣下陷補中益氣湯肝經風熱防風黃芩作丸服風入腸胃胃風湯大全方治妊娠忽然下黃汁如膏或如豆汁胎動腹痛用黃芩一兩川芎一錢糯米一合煎服○暴下水者其胎必下若徐徐而下者可用補氣安胎藥止之

驚胎僵仆○妊娠負重跌蹊凝血作痛欲服活血藥則恐傷胎不服則傷血不去治之當辨胎之死生如無別證只用黑糖熬枯入紅酒童便調服細嚼連皮胡桃肉過口死者當下生者其痛卽止如餘傷未盡痛未止馬湯加延胡木香傷去而胎氣未安紫蘇飲加童便砂仁傷重者香殼散加熟地當歸以護胎勢劇者下瘀血湯加芎歸酒煎以去血血去則胎自安然須詳慎若昏睡語言如狂此血迫心包當歸活血湯如腹中重墜按之冰冷此胎氣已傷急用香桂

散加酒大黃生附子下之。若口中覺穢氣者，急用平胃散加芒硝下逐之。○若因怒跌仆，或手足抽搐者，紫蘇飲加釣藤、釣子去血過多，八珍湯去茯苓加膠艾黃耆。

胎上逼○妊娠胎動氣逆，皆由調養失宜，致胎逆上。紫蘇飲爲必用之藥，飲食不甘，兼四君子有熱加苓、芍、歸、芍。若惱怒傷肝，致胎逆上，加味逍遙散。因鬱結傷脾，胎氣不安，加味歸脾湯。大抵胎氣逆上，皆屬火旺，急用芩、朮、香附之類，不可服大寒之藥，反致他變。

○妊娠遍身痛。或衝心欲死。不能飲食。緣胎有水。致痛也。千金鯉魚湯。或用白朮五錢。黃芩二錢。白芍四錢。入活鯉魚約重半觔外一尾。煮湯代水煎服。○妊娠胎動。晝夜呼叫。口噤唇寒。及下重痢。不息者。用艾葉五兩。以好酒五升。同煮三升。去滓更煎。取一升服。口閉者。開口灌之。藥下即瘥。○臨月胎上逼心。嘔噦欲死。急用童子小便灌之。即下。或烏梅肉十枚。研爛入生薑三片。煎湯灌之。亦下。取酸以降。飲之。兼辛以散火氣之逆也。

陳良甫治一婦孕七月。忽然胎上衝心而痛。坐臥不安。醫治不効。又作死胎治。而用草薢麝香研貼臍中。命在垂亡。陳診之。兩尺脈皆絕。他脈和平。曰。此子懸也。若是胎死。必面赤舌青。今面不赤。舌不青。其子未死。是胎上逼心。以紫蘇飲治之。十服而胎安矣。

安胎○婦人半產。多在三箇月及五月七月。除跌撲損傷外。因內熱而虛者爲多。曰熱曰虛。當分輕重。若前次三箇月而墮。則下次必如期復然。蓋先於此時。

受傷故復至期必應乘其虛也。遇有半產者須多服養氣血固胎息之藥以補其虛損。下次有胎先於兩箇月後即用固胎藥十數服以防三月之墮。其有連墮數次胎滑甚者服藥須多久則可留。八珍加陳皮膠艾條芩多氣加香附砂仁。肥盛有痰加半夏。若瘦而多渴者禁用。○懷妊三四月肥盛色白氣虛者用白朮一倍。人參續斷山藥香附各半倍。枳實湯泛爲丸。朝暮砂仁湯下三錢。肥盛色蒼氣實者不須服藥。至七八箇月但服砂仁湯或紫蘇湯足矣。瘦而色白

虛弱者。白朮二倍。人參一倍。山藥續斷。芎藭各半倍。
陳米飲和丸。朝暮沸湯下三錢。瘦而色蒼。血熱者。酒
煮條芩。四製香附各一倍。四物各半倍。蜜丸。朝暮沸
湯下四錢。至八九月。肥盛色蒼者。必用枳殼。蘇梗。以
順其氣。慎不可用補氣之藥。非但參朮當禁。厚味亦
宜節省。肥白氣虛者。則人參白朮必當加用。但補氣
藥中。必兼香附。砂仁。以流動其氣。若色白。怯弱者。全
以補養氣血爲主。非但枳殼。蘇梗輩不可用。卽砂仁
亦不宜也。誤耗其氣。必致難產。若色蒼。形瘦者。此氣

血流薄。常無難產之患。或久抱鬱結之氣。間或有之。多服逍遙散可也。○有誤服行胎毒藥。胎動不安者。古法用生甘草。黑豆。淡竹葉煎服。若發熱用香豉。然不若頻與熱童便尤良。以其能解藥毒也。血下不止。或上溢而爲吐衄者。四物換生地。加阿膠。山梔。炒黑。蒲黃。若胎傷不安者。消息緩急虛實治之。○凡妊娠脈宜滑利。數實大忌。遲滯浮緩。

半產○半產俗名小產。蓋由衝任氣虛。不能固養。或顛撲閃墜。致氣血損動。或因熱病溫瘧之類。薛立齋

云半產重於大產。蓋大產如果熟自脫。小產如生採破其皮殼。斷其根蒂。豈不重於大產。但人輕忽致死。者多。治法宜補形氣。生新血。去瘀血。若未足月痛而欲產。八珍去茯苓熟地。加膠艾。蓄草。若胎下而血不止。參。蓄。朮。草。膠艾。歸。芍。之類。有熱加炮薑。茯苓。半產而心腹痛。或發寒熱。以手按之愈痛者。宜散瘀血。芎歸。延胡。桃仁。香附。丹皮。澤蘭。童便之屬。若按之則痛緩。是血虛。八珍去芍。加炮薑。若痛而嘔吐作瀉。是胃虛。六君子加炮薑。凡胎氣弱欲小產者。八珍湯固之。

若出血過多而發熱聖愈湯汗不止急用保元湯發
熱煩躁肉瞤筋惕十全大補湯大渴面赤脈洪而虛
當歸補血湯身熱面赤脈沉而微四君子加薑附
東垣云婦人分娩及半產漏下昏冒不省瞑目無所
知覺蓋因血暴亡則心神無所養心包絡火上熾故
令昏冒火勝其肺故令瞑目不省人事慎不可用寒
涼瀉火之藥蓋瞑目之病悉屬於陰卽如傷寒鬱冒
得汗而解必當補而升舉之古法用全生活血湯其
間風藥虎雜而無陽生陰長之功宜補中益氣加門

冬五味。或大劑獨參湯。尤妥。血若暴下。是秋冬之令太旺。今舉而升之。助其陽。則目張而神不昏矣。

石碩治一婦懷孕六月。因喪子悲哭。動胎。醫用黃芩白朮輩安胎藥。二服不應。改用枳殼香附紫蘇砂仁理氣一服。胎遂上逼心下。脹悶喘急。口鼻出血。第三日午後來請。石碩薄暮往診。其脈急疾如狂風驟雨。半餘至。則不至。頃之復至。如前。因諭之曰。此孕本非好胎。安之無益。不若去之以存母命。因思此胎必感震氣所結。震屬木。惟金可制。令以

鐵斧烈火燒紅醋淬來熱調。苾芎末一兩灌之。明日復來請云。夜半果下異胎。下後脈息微。和神思恍惚。所去惡露甚多。又與安神調血之劑數服而安。

胎不長養。○石頑曰。胎之長養。皆賴母之脾土輸氣於其子也。脾爲一身之津梁。主周身之運化。在藏爲土。長養萬物。莫不由此。故胎之生發。雖主腎肝而長養實關乎脾。所以治胎氣不長。必用八珍十全歸脾補中之類。助其母氣。其胎自長。多有延至十二三月。

而產者。觀瘠薄之土。雖執不獲得沃澤。灌溉便能成實。義可見矣。亦有妊母氣血自旺。而胎不長者。此必父氣之孱弱。又當大劑保元。專補其氣。不得雜一味血藥助母。則子氣方得受益。復有胎氣因妊母舉動失措。致兒內失榮養。不能長發。仍不墮墜者。此與果實乾萎在枝無異。以妊娠氣血無恙。但子不得稟母氣耳。非若妊娠有疾。枝傷果墜之比也。

過期不產。○月數過期而不產者。屬氣虛。亦有因胎痛而產遲者。嘗見妊娠下血胎動不墜。其氣血亦虧。

多致踰年不產。或十四五月而產者。俱是氣血不足。肝胎難長故耳。凡十月之後不生者。當大補氣血。庶分娩無憂。又過期不產。而胎沉細。但當臍下悸動。此為瘀積化水。當作鬼胎治之。

許裕卿治邵涵貞內子。孕十七月不產。不敢執意。憑脈問諸情況。果孕非病。但云孕五月以後不動。心竊訝之。為主丹參一味。今日服七錢。兩旬餘。胎下已死而枯。其胎之死。料在五月不動時。經十三月。在腹不腐而枯。如果實在樹敗者。必腐。然亦有

不腐者則枯胎之理可推也。石頑曰：余昔治馬雲生婦，孕十三月不產，脈來微結，爲處十全大補湯服至二十餘劑而下，胎枯色白，所治雖異而胎枯則一也。

欬嗽○娠婦欬嗽，悉以安胎爲主。風邪傷肺，杏蘇散。寒邪傷肺，小建中湯。若肺胃氣虛，異功散。脾肺氣虛，六君子加當歸。久嗽不愈者，多因脾肺氣虛，理不密，復感外邪，或因肺虛，陰火上炎所致。有外邪者，內補當歸建中湯加細辛、陰火炎者，六味丸加麥冬、五

味

子煩○妊娠苦煩悶頭目昏重是心膈虛熱或痰積於胸吐涎惡食千金竹瀝湯若熱甚則胎動不安煩悶口乾不得眠者加味竹葉湯氣虛者倍人參氣滯紫蘇飲痰滯二陳加白朮黃芩枳殼脇滿寒熱小柴胡脾胃虛弱六君子加紫蘇山梔

類中風○此證若不早治必致墮胎宜服紫蘇飲若口噤不能言用白朮三錢荆芥穗二錢黑豆三合炒淋酒煎服得汗卽愈口噤者搗口灌之可服三四劑

至有目昏黑而厥者。胎前絕少。但一有此證。卽是兒
暈。屬氣與痰。故目昏黑。發厥。只服紫蘇飲。慎不可服
蘇合香丸及烏藥順氣散等。

傷風。○妊娠傷風。香蘇散去香附加葱豉。欬嗽多痰。
加桔梗。或紫蘇飲加葱豉。安胎爲妙。嗽兼瀉。氣口脈
滑實有力。中有宿食者。胃苓湯去蒼朮。俟脾胃實而
治嗽。總不如濃煎葱頭湯爲上。蓋風藥皆能墮胎。故
嗽喘胎寒。多用蓮鬚葱湯。大能安胎。散氣。胎始無虞。
或加香豉尤妙。若不喘者。紫蘇飲加砂仁。童便。

傷寒少冬時爲寒所傷。輕者漸惡寒。翁翁發熱微嗽。鼻塞數日乃止。重者頭疼作痛。先寒後熱。久則傷胎。藥多避忌。不與常婦概治。但服葱白香豉湯。汗出則愈。千金治妊娠傷寒。用葱白十莖。生薑二兩。水煎熱服。取汗卽安。治妊娠熱病。用葱白五莖。香豉一升。如前服法。取汗。若胎傷未死。但用葱一把。水煮食之。汗出卽安。若胎已死。須臾自出。不應加生薑蘇葉。不可輕用發表藥。若用發表。豈但墮胎。母命難保。惟葱白香葱湯。香蘇散。可解邪氣。又可安胎。妊娠溫熱。

時行及傷寒邪氣內犯熱毒迫胎。並宜千金石膏大
青湯急救。庶可保全。遲則不救。凡胎前疫證與傷寒
陽明府證。內實便秘。須急通大便。方不損胎。若大便
自利者。真氣下泄。胎必難保。惟大小便如常。知裏無
熱。則不傷胎氣。

瘧。○妊娠瘧。無論胎息月數多少。總以安胎爲主。
而舉世安胎。無過黃芩白朮。原夫胎息之安與不安。
全在母氣之調與不調。故安胎先安母氣。安有母氣
乖戾。胎氣獨安之理。當知黃芩之安胎。惟治熱盛胎

動不寧。白朮惟主脾虛。不能保胎。設氣虛胎氣下墜。誤用黃芩。氣滯胎不轉運。誤用白朮。滋害何可勝言。所謂先安母氣者。隨其形體之肥瘦。氣血之偏勝也。若妊娠形盛色蒼。肌肉脰堅者。必多溼多痰。無論何疾。必顯溼熱本病。脈多滑實有力。絕無虛寒。脈弱之候。可峻用豁痰理氣藥治其本質。然後兼客邪見證而爲製劑。治宜二陳湯隨經加透表藥。或合小柴胡用之。蓋柴胡爲瘧證之嚮導。故多用之。然有自汗過多。尺中微弱。或熱盛手足清者。始終不用柴胡。而用

建中桂芍收功者。或見煩渴脈實。大便六七日不通。陽明府實。又宜涼膈去硝黃。加鮮首烏調之。須知稟質堅固者。其氣多滯。內外壅遏。但有溼熱。絕無虛寒之患。如元氣本弱。或病後得之。必需理脾行氣。惟六君子湯爲合劑。有痰食結滯。則加枳實。草果。內有寒。則加炮薑。外有風。卽加桂枝。胎動上逆不安。則加子芩。胎下墜。則加柴胡。倍人參。以人參爲舉胎聖藥也。間有不應者。又需補中益氣。大劑人參。以升舉之中。有留滯。則枳實埋中。加柴胡。桂枝。合表裏而治之。若

夫日作間作日晏日早晝發夜發寒多熱多及審飲食便溺動靜安危之法則與常瘧無異也大抵病邪初發元氣未耗疎風滌痰消導飲食在所必用然須大劑白水培護中土以脾胃爲一身之津梁土厚自能載物也其最可慮處尤在三四發至六七發其勢最劇若過半月雖淹纏不止邪熱漸衰可無胎前之虞矣或有瘧久氣血虛敗而小產者此皆失於調治也若六七發後不止卽當和營健脾若稟質柔脆者雖有風邪不得純用表藥以風藥性升能使胎氣上

逆而爲嘔逆喘脹。膈塞痞滿之患。雖有實滯。不得過
用降泄之味。能引邪氣下陷。致胎墜不安。而爲泄利
不食。小腹疼重之患矣。若疫癘毒盛。勢劇急。與涼膈
承氣黃連解毒救之。瘟癘昏昏不爽。煩熱大渴。或壯
熱無寒。或先熱後寒者。當與桂枝白虎人參白虎。撤
其在裏之熱。不可與夏秋痞瘧比例而推也。蓋有是
證而用是藥。有故無損。亦無損也。惟在速祛邪毒。以
救胎息之燔灼。若遲疑未決。下手稍軟。救無及矣。
痢○妊娠痢下。有三禁五審。一禁蕩滌腸胃。二禁滲

利膀胱三禁堯瀉滯氣。蓋蕩滌則陽氣下陷。胎氣愈墜。滲利則陰津脫亡。胎失榮養。堯瀉則濁氣愈滯。後重轉加。故善治妊娠之痢者。惟以調氣爲先。蓋調氣之法。如爐冶分金。已敗之積沫。則隨氣而下。未傷之津液。則統之而安。不善治痢者。惟守通因通用。痛無補法之說。峻用苦寒。蕩滌使未傷之津液。溷則敗。穢之中。建瓴而下。在胃氣有權者。尚可勝其藥力。譬諸引汲灌渠。一次而蕩。無餘滓。陳腐去而倉廩白。修津氣自復也。若腎氣不固之人。秘藏不密。五液盡隨轉。

利藥注下。使既病之津液。更加猛利峻攻。不致精神
離散。血液告竭不已。况能保其胎息乎。夫調氣之藥。
有三善。一使胃氣有常。水穀輸運。二使腹滿腹痛後。
重漸除。三使濁氣開發。不致侵犯胎元。此治妊娠下
痢之大端也。所謂五審者。一審飲食之進與不進。夫
下痢乃腸胃受病。若痢勢雖甚。飲食無妨者。易已。故
痢以噤口爲最劇。在初起濁邪全盛之時。不足爲慮。
但要清理積滯。飲食自進矣。若七日已後。尚不能食。
脈反數盛。此必初時失於清理之故。急需調氣理中。

則積沫漸下。飲食漸進矣。或初時能食。至一旬一氣。後反不能食。脈息不振。此必蕩滌太過。胃氣受傷。所致。亦有過用芩連檳朴。苦寒破氣。而致呃逆嘔噦者。胃氣大敗。最危之兆。惟峻與溫補。庶可挽回。若脈見數疾無倫。或翕翕虛大。或歇止不前。或絛細搏指者。皆胃氣告匱。百不一生矣。二審洩之通與不通。下痢清濁不分。若痢雖頻而水道順利者。胎必無虞。若月數將滿。胎壓膀胱。每多洩便頻數。轉胞脹悶之患。切禁利水傷津。急與開提自通。但須察其脈無過旺過

硬之形。便宜補中益氣。稍加澤瀉車前。以升清降濁。投之。無不輒應。非特妊娠爲然。卽平人久痢。津液大傷。而溲瀉不通者。亦宜上法也。三審腹之痛與不痛。下痢腹痛。必然之理。然間有濁溼下趨。而無鬱沸之。大者則不痛也。但此多見於肥白人之白痢。若血痢。與瘦人多火者。罕見也。治宜調氣運積。不用清火。明矣。原其腹痛。有寒熱之分。痛有止歇。痛則奔迫下墜。至固不及者。火也。痛自下而攻擊於上者。火也。痛而脹滿不勝摩按。熱飲愈甚者。火也。實也。痛無止歇。常

時痛而無絞刺者寒也。痛自上而奔注於下者寒也。
痛而不滿時喜溫手摩按飲熱暫緩欲至固而可忍。
須臾者虛也。寒也。大約初痢脹痛爲熱爲實久痢疔
痛爲虛爲寒。卽初因火注切痛痢久氣傷亦必變爲
虛寒也。故人痢腹痛之脈無論大小遲數但以按之
漸漸小者並屬虛寒。急須溫補。慎勿利氣。惟急痛脈
實久按不衰者可稍用炮黑薑連和之。四審後之重
與不重下痢後重濁氣壅滯也。夫開通壅滯必以調
氣爲本。任妊娠尤爲切要。調氣則後重自除而胎息

自安矣。但初痢後重者。宜開發其滯。若久痢後重。又當升舉其陽。陽氣升則胃氣運。胃氣運則周身中外之氣皆調達而無壅滯之患矣。故治孕婦之後重。無問胎之大小。但脈見有餘。則宜調氣。脈見不足。便與升提。雖血痢亦宜陽藥。一切滋膩血藥。總無干預。以氣有統血之功。則血無妄行之慮也。五審身之熱與不熱。下痢爲裏氣受病。若見身熱。表裏俱困。元神將何所恃而得振祛邪之力哉。惟人迎之脈浮數。可先用和營透表之法。分解其勢。然後徐行清理。若初痢。

不發熱數日半月後發熱脈來漸小或虛大少力者此真陰內亡虛陽發露於外在平人或可用辛溫峻補飲之以歸其源若妊娠則桂附又難輕用惟藉參朮薑萸膠艾之屬非大劑濃煎峻投難望其轉日回天之功也或有痢久衛虛起居不慎而感冒虛風發熱者但當察其左手三部必顯浮緩之象又需理中湯加桂枝合表裏而治之以內氣久虛之邪不得參朮助其中氣則客邪不得解散也五審既明三禁勿犯又當審察其積之稠與不稠色之鮮與不鮮則元

氣之厚薄病患之寒熱可曉然無惑矣。如赤白寒熱之辨。昔人擬議紛紜。要非正論。以大畧言氣分之病。其色白。血分之病其色赤。氣血素亂則赤白兼并。蓋氣屬陽。陽傷則受冷居多。卽有火注下迫。皆陽氣鬱遏。本寒標熱之證。不可純歸於熱。但當驗其積之稠枯。如糊色白如脂。方可暫與清熱。治標若汁沫如水色晦如塵。急須溫理其氣。卽有熱證皆假象無疑也。血屬陰。陰傷則受熱居多。然多有氣傷陽不統陰之血。又不得不從事於辛溫也。故治血病尤當以色之。

顯晦驗其虛實寒熱此義前人未發也故凡積之瘕
晦不鮮清稀不稠者皆係虛寒之候卽前所云陽不
統陰之血急投人參薑艾庶或保全倘不審而誤餌
芩連是速其斃也惟積之稠粘紫赤而光澤者合用
苦燥以堅腸胃之滑脫又必佐以調氣之藥則陰邪
得以解釋升若白痢之不可繼以芩連芍藥等味引
領滯穢。兼傷陰血也。況有病後瘡後或本質虛羸之
人及秋冬天令寒冷時下痢加以胎孕扼腕可與平
人夏秋之痢同日而語哉予嘗用厚朴湯去乾薑治

妊娠能食腹脹後重積穢稠粘之白痢甘草乾薑湯
理中湯治妊娠腹痛少食積沫清稀之白痢厚朴生
薑甘草半夏人參湯治妊娠腹脹後重赤白相兼之
痢黃芩芍藥湯送香連丸治妊娠能食後重積穢稠
粘之血痢連理湯合金三物膠艾湯治妊娠少腹
疼痛瘀晦不鮮或間有鮮血之痢駐車丸治妊娠發
熱後重陰虛畏食之血痢白頭翁加甘草阿膠湯治
妊娠熱毒內攻噤口不食腹脹後重膿血稠粘之痢
千金膠艾榴皮湯治妊娠膿血清稀胎動不安久世

不止之痢補中益氣湯治紅娠先瘧後痢及瘧痢齊作元氣下陷胎氣下墜小腹頻數或轉胞不得溺之痢以上諸方並加砂仁以調其氣烏梅以調其血未常不隨手輒効也。

石頑治郝

失記其字

媳懷孕九月患瘧三四發後卽嘔

惡畏食診其脈氣口濡數不調左關尺弦數微滑此中脘有冷物阻滯之候以小柴胡去黃芩加炮薑山楂四服稍安思食但性不嗜粥連食肺鳴之類遂瘧痢兼併胎氣下墜不安以補中益氣去黃

著加香砂烏梅五服而產產後瘧痢俱不復作矣
其僕婦產後數日亦忽下痢膿血至夜微發寒熱
小腹脹痛與千金三物膠艾湯去榴皮加炮黑山
楂六服而瘳

林○妊娠小便淋者乃腎與膀胱虛熱不能制水
然妊娠胞系於腎腎間虛熱移於膀胱而成斯證若
小便滴少淋瀝生料六味丸加麥冬五味肉桂車前
若膀胱陽虛陰無以化腎氣丸肺氣虛而頻數短少
生脈散加山藥澤瀉若小腸熱小便赤澀導赤散若

肺虛膀胱熱而氣化不行生濕合導赤散若因肺經
蘊熱黃芩清肺飲肝經溼熱加味逍遙散膏粱厚味
加味清胃散若因勞役所傷或食煎炒小便帶血此
血得熱而流於脬中補中益氣加丹皮梔子若因脾
胃氣虛胎壓尿脬而胎脹腹痛八珍湯倍茯苓加橘
半空心服服後探吐藥出氣定又服又吐數次必安
遺尿○妊婦遺尿不覺胎滿故也千金白薇散薛氏
云若脬中有熱加味逍遙散脾肺氣虛補中益氣湯
加益智仁肝腎陰虛六味丸○孕後有水從陰戶出

不止者。千金鯉魚湯加肉桂人參。

諸血。○妊婦尿血。熱乘血分。以致流滲於脬。名子淋。導赤散。若因怒動肝火。小柴胡加山梔。若脾氣下陷。及勞動脾火。補中益氣加茯苓車前。若因厚味積熱。加味清胃散。若因肝脾血熱。加味逍遙散。

妊娠吐衄。○由七情藏府所傷。氣逆於上。致血上溢。不止。心悶甚者多死。或墮胎也。若肝經怒火。加味逍遙散。膏粱積熱。加味清胃散。鬱結傷脾。加味歸脾湯。肺經有火。黃芩清肺飲。因氣鬱滯。紫蘇飲。氣不攝血。

補中益氣去升麻加煨葛根腎經虛火六味丸加麥冬五味。○欬嗽咯血胎前皆不宜見面赤聲啞不治。○咯血吐血多致墮胎胎賴血養不宜漏溢紫蘇飲加條芩如產後吐衄咯血者皆難治。○漏極如同月水胞乾胎死母亦難保。○腸風藏毒腸胃不調脹滿下血者平胃散去蒼朮加槐角防風當歸烏梅。諸痛。○宿有偏正頭風川芎茶調散宿有冷痞痰飲結聚或新觸風寒邪正相擊上衝於心則心痛下擊於腹則腹痛痛不已則胎動不安此病多寒多食間

有屬熱者。並宜正氣散。寒加木香炮薑。食積發熱加
芩連炮薑。氣加砂仁。香附痰加橘皮。生薑。若因錯雜
之邪。當審其因而治。○胎前產後心痛。用川棟茴香
炒各三錢。鹽炒艾葉錢半。水煎服之。○腹痛或發或
止。名曰痛胎。屬血少。四物加香附爲末。紫蘇湯送下。
氣滯者。紫蘇飲。○胃口痛。禁用指迷。但宜養胃湯。妊
娠腹中滿痛。又心不得飲食。千金芩朮芍藥湯。○脇
痛。其故有三。哭泣也。內傷也。惱怒也。有胎不宜服。行
傷破氣藥。只宜童便和酒服之。或紫蘇飲去參。用白

芍當歸加砂仁童便。雖曰傷重。勿服傷藥。且須安胎。
為要。○背痛氣滯也。紫蘇飲。○腰與背痛。是因勞傷。
損動痛不止。多動胎氣。補中益氣加續斷杜仲。有因。
淋證作痛者。居多。當審治之。走注痛者。敗血入經之。
證。四烏湯加薄桂杜仲續斷。肥盛人多溼熱腰痛重。
墜。或下白物者。二妙散加柴胡防風茯苓半夏。氣血。
鬱滯。遍身拘急不舒而痛。眼生黑花。夜不能卧。紫蘇。
飲加枳殼桔梗。○腰痛甚者。腎虛極也。其胎必墮。急。
服八珍湯加膠艾黃耆。或紫蘇飲加減。○臍下冷痛。

腹脹虛疼小便頻數大便虛滑皆食生冷所致小建
中加炮薑木香不應更加茴香良薑○小腹痛由胞
絡虛熱相搏所致紫蘇飲加生薑虛寒用膠艾湯不
應寒甚也加桂附溫之內傷甚者胎下無疑若服不
効須視小腹近下處若腫脹浮薄發光者孕癰也干
金托裏散或薏苡仁煎汁飲若心腹急痛煩悶面青
令汗氣絕血下不止其胎上衝者不治
子腫○妊婦四肢浮腫或腹大者其證有二有水腫
有胎氣腫然胎前水腫者少只是胎氣謂之子腫乃

氣病也。蓋因藏府本虛。脾土不能制水。血散四肢。遂腹脹。手足面目皆浮。甚則通身腫滿。心腹急脹。悉宜紫蘇飲。小便不利者。其胎氣兼水氣也。紫蘇飲加澤瀉。白朮。茯苓。木通。若發浮氣喘。腹脹。服藥後腫退皮寬。六君子調理。若面目虛浮。肢體如水。氣腫脹。全生白朮散不應。六君子加腹皮。車前。下部腫甚。補中益氣加茯苓。或因飲食失宜。嘔吐泄瀉。此是脾胃虧損。六君子加炮薑。木香。香附。若足指發腫。漸至腿膝喘悶不安。或是指縫木出。名子氣。乃婦人素有風氣。或

衝任有血挾風水不可妄投湯藥。二陳加烏藥香附。木通脾胃虛弱。更加參朮兼進逍遙散。不應紫蘇飲。凡妊娠經血壅閉。忽然虛腫。乃胞中挾水。水血相搏。脾胃主肌肉。而惡溼。溼漬氣弱。則肌肉虛。水氣流溢。則身腫滿。或因泄瀉下痢。藏府虛滑。耗損脾胃。或因寒熱煩渴。引飲太過。溼漬脾胃。皆能使手足頭面浮腫。然水漬於胞。兒未成形。則胎多損壞。及其臨產。腫脚微腫。乃胞藏血少。水多。水出於外。故現微腫。則易生也。妊娠通身浮腫。胸脇不分。或心腹急脹。名曰胎

水千金鯉魚湯。有妊娠腹脹。服前湯三五劑。大小便
皆下惡水。腫消脹去。遂下死胎。此證蓋因懷娠腹大。
終不知胎水之患也。鄭虛菴曰。身半已上腫者。發
汗。身半已下腫者。利小便。上下俱腫。汗利分消其溼。
若脣黑。缺盆平。背平。臍突。足底平。皆不治。
不語。不語者。多爲痰閉心竅。亦有墮胎。不須服藥。
岐伯曰。人有重身。九月而瘖。此胞絡之脈絕也。胞絡
者。繫於腎。少陰之脈貫腎。繫舌本。故不能言。無治也。
當十月復。凡患此者。濃煎生脈散。空心服。地黃丸助。

肺腎之氣以養胎。若與通聲開發之藥誤矣。

讖語○妊娠讖語爲藏府熱極之候。急宜童便時時灌之。不應。用生地黃黃連散清其血中之火。庶胎得安。脈實者加酒大黃下之。下遲則傷胎也。亦有傷胎下血。心神無主而讖語。雖用峻補亦難得効。若舌青者。子死腹中。急當下之。若雙胎。一生一死者。必腹中半邊冷。半邊熱。因母患熱證。藏府熱甚。蒸其胎。兒因致死。但服黑神散加生蒲黃以煖其胎。胎卽出矣。胎未死。升泥塗臍以護胎氣。多有保全者。

子懸。胎氣瘀泊上心。忽然昏暈。人事不省。謂之子懸。必妊娠素多鬱悶。痰氣壅塞。致胎不安。乘其鬱火升迫。心下喘脹。腹痛甚。則忽然仆地。急宜童便灌之。次以紫蘇飲。加鈎藤。茯苓。薑汁。童便。將產時昏眩。亦宜紫蘇飲。若誤作中風治之。必殆。

子癇。○妊娠體虛受風。則口噤。背強。胃悶。不識人。須臾自蘇。良久復作。謂之風癇。亦名子癇。甚則角弓反張。逍遙散。加羌活。羚羊。角。棗仁。鈎藤。豆淋酒煎服。鄭守恒云。子癇一證。人不易識。或眩暈。或冷麻。重至仆

地不省人事。驗其平日眼目昏沉。或認白爲黑。認黑爲白。是其漸也。

乳泣腹啼。○未產乳汁先下。此名乳泣。生子多不育。又有兒在腹中啼哭者。因妊婦登高舉臂。脫出兒口。中血乳。以此作聲。令妊婦曲腰就地。如拾物狀。或令掃地。仍入兒口。卽止。亦有胎熱不安而啼者。以黃連濃煎汁。妊娠時時呷之。

鬼胎。○古人論鬼胎之說。皆由其人陽氣不足。或肝氣鬱結。不能生發。致陰血不化而爲患也。有因經行

時飲冷停經而成者。有鬱痰驚痰溼熱凝滯而成者。有因悲怒氣食痰積互結而成者。故凡鬼胎之必沉細弦。或有時虛浮。有時沉緊。皆陽氣不充之驗。其腹雖漸大而漫起重墜。終與好胎不同。前臍或臍下左旁雖微動。亦與真胎迥別。治宜理氣行血爲主。如因於鬱者。逍遙散加莪朮烏藥香附。麝香。因於寒者。理中加烏頭蓬朮香附。因於痰者。導痰加香附烏藥乾漆炒桃仁。因於驚者。四七湯加茯神辰砂桂心麝香。因於氣食者。大七氣加酒麴。因於溼熱者。當歸

龍薺丸加蓬朮蘇木香附。因血結者代抵當去芒硝。
大黃加煇硝硫黃五靈脂。虛人只用十全大補加桂。
是。可緩圖收功。不可峻用巴豆芫花莽草鬼臼等。
劫藥急迫取咎也。嘗見得孕經止。尺脈或濇或微弱。
而無他病。此子宮真氣不全。精血雖凝而陰不能化。
終不。成形。每至產時而下血塊血胞。若此必大劑溫。
補預調而後方能成孕也。

下私胎法。○妊娠諸病以安胎爲主。慎勿妄下。天傷。
人命造孽非小。有生育多畏產而欲下者。當與安胎。

之品。准私胎方可下之。香桂散加烏頭尖一錢立効。
若本元虛寒者得辛溫之藥愈助其生發之氣宜土。
牛膝一兩。歸尾三錢。川芎一錢。蘇木三錢。桃仁泥三。
錢。穿山甲一錢。三四服必下。煎成加麝香尤速。或麴。
四兩酒三大盞煎取一盞五分綿濾分溫三服立下。
○又方大麴五升清酒一斗煮二沸去滓分五服隔。
宿勿食但再服其子如糜母無疾苦○又方麥蘖一。
升爲末和水煮二升服之立下○又方以附子二枚。
爲末醇酒和塗右足去之大良然不若以牛膝相者。

取五七寸。候著子宮。將二指夾著。送進。擦入三寸許。以線繫定。用帛兜束腰中。不使退出。毋論月數多少。一夕卽下。無不應者。

斷子法。○用酒麴一升。無灰酒五升。煮至二升半。濾去滓。分三服。經候至前一日。晚進一服。次早五更一服。天明一服。月經卽行。終身無妊矣。此千金下死胎法也。若婦人四十餘。欲其經斷。以前方加牛膝紫葳各一兩。經行後。如前法服之。卽斷。又木耳煨灰存性。熬枯黑糖調。經行後。或產後月內服之。卽不孕。孕婦

服其胎卽下。又頭蠶子三錢煨灰存性。產後三五七
朝內陳酒調服。則終身不孕。雖虛人亦無妨礙。

臨蓐

扶持○妊娘九箇月宜服達生散數服若肥盛氣實者用枳殼二兩香附甘草各一兩爲散沸湯下二錢早暮各一服血實色蒼者枳殼二兩當歸一兩爲末煉蜜丸空心酒服五十丸然元氣虛弱者惟大劑紫蘇飲鼓舞其氣生產必易若誤服前藥反耗其氣多致難產

傷胎○臨月胞水不破血先下者此是傷胎非產也大劑保元湯加當歸童便最爲得力因臨產行動已

傷其胎而發熱者多危。紫蘇飲倍人參。

胞乾○臨蓐胞水惡露破盡致兒乾閣艱澹達生散。
去木倍人參。若胞衣破久其血已涸元氣困憊急用。
人參兩許當歸二錢煎飲盡則再煎助其氣血。
爲得力。捨此而通用催生耗氣諸藥總無一効也。
難產○難產者腹痛久而未產也。若惡露少者雖久。
不妨此胞水未破俟胞水行時自產。若連腰痛甚者。
將產也。蓋腎候於腰胎繫於腎故也。如胞水先破惡。
露行盡累日不能下者當補養氣血慎不可用破血。

耗氣之藥。急用佛手散。加入參二三錢。入熱童便。調服。此取純陽生氣。切不可停冷。冷則生氣去而無益。於治也。或用前藥。送兔腦丸。亦妙。難產須擇精細穩婆。最爲切要。惟胎氣逆上。全在醫治之功。如氣滯逆上。頻以熱溲便灌之。但得白色者。卽佳。不必拘用童子之便也。氣虛不能駕馭其胎。而上逆者。獨參湯加溲便服之。甚至昏暈吐沫。搐搦。識語者。急控頂髮。挾開牙齒。以溲便灌之。稍遲則不救矣。丹溪云。世之難產者。往往多見於鬱悶安逸之人。富貴奉養之家。若

辛苦貧賤鮮有之也。古方止有瘦胎飲一論。其方爲
湖陽公主而作。恐非至當之言。余族妹苦於難產。遇
胎則觸而去之。予甚憫焉。視其形弱而勤於女工。知
其氣虛。久坐氣不運而愈弱。兒在胞胎。因母氣虛不
能自運耳。當補其母之氣。則兒運易產。令其有孕。至
六月來告。遂以紫蘇飲加補氣藥。與數十貼。得男甚
快。因以此方隨母之性。稟與時會。加減服者。無不應
驗。臨蓐時去川芎。生薑加白朮。黃楊腦。則腹不覺痛。
母亦無病。因名方爲達生散云。○難產及胞衣不下。

急於產母右脚小指尖頭上灸三壯炷如小麥大火去卽產。○凡難產兒下多有不哭者切勿燒其臍腸。後必不育。○凡臍帶粗大或青色斷多鮮血者及落。下過早過遲者皆不育誠驗。

石頑曰難產之患多緣婦人稟性執拗懷孕之日不檢束身心任意作爲以致氣血乖違胎孕偏著臨產之際雖通用催生方藥畧無一驗以數月失和之胎息一時豈能克應况有坐草多日血氣大虧者惟大劑獨參湯峻補其氣方能逆力送產獨怪世之穩婆。

及生產家左右之人。皆堅持產中禁用人參之說。坐視其斃者多矣。安知產中誤用人參爲害者。皆是力作勞勩。軀體堅韌之人。雖有疾病。祛之則安。奚俟補爲。設強與服之。心膽先裂。是不能無助火發熱。凝滯惡露之患矣。若夫膏粱逸豫。參養柔脆之家。平時慣服服之。泰然何助火滯氣之有。余室人素稟孱弱。而多沉鬱。每產必用人參一二兩。濃煎時呷以助其氣。聽其自產。雖二三日無恙。兒媳亦患氣滯難產。穩婆艱阻服參至第四日。子殞腹中。不得已煎大劑參湯。

灌之產後方云未服參已前其瞶目盲惟見滿室紅
光繼而漸漸紫黑及服參後開眼卽能辨物神氣亦
能主持腹中便有痛陣始信服參之驗近日同道王
公峻室人難產竟日不下自煎人參七錢頓服便產
其助力之効非他催生藥可比因詳述以破世俗之
惑。

產變○兒未生先露手臂謂之橫生蓋因產母用力
太早之故當令安然仰臥使穩婆推入盡上以中指
抵其肩漸扳兒耳而正之令服大補氣血藥如獨參

加當歸童便之類。切勿驚怖產母。使氣血凝滯。關竅轉閉也。候兒身正。門路皆順。然後用力。○胎氣不足。關鍵甚牢。用力太早。兒不能自順。只一直下。先露其足。謂之倒生。亦如前法。用力卽下矣。○兒方回轉。未能全正。却被產母用力。致兒頭偏左偏右。雖近門路。不能卽下者。謂之偏產。亦如前法。○兒方出胞。氣力不續。身未轉運。却被產母用力一逆。則兒臂先露。謂之坐臂生。亦如前法。令服補氣和血之藥。安卧靜養。候其力完。轉運然後用力。○兒出胞轉身時。偶然臍

腸盤於頂上牽緊不能卽下者俗名背包生亦宜推入輕輕撥去然後用力○兒出胞時頭必轉向產門自然正產若無力轉運腳踏胞衣臍腸先出謂浪臍生急令穩婆理清推入稍候氣平乘勢就其脚下不可推轉久延久則臍腸復下便難收拾矣○人之二腸俱有脂膜聯絡間有生成無膜聯絡者則產時其腸隨兒而下謂之盤腸產須用漆器溫湯滌淨務令溫煖溼潤盛其所下之腸切勿稍沾塵垢及著乾物卽不肯上而粘住斷絕矣全在穩婆精細爲妙○天

氣嚴寒。經血凝滯。致兒不能下。凡遇此際。切不可就脫寒衣。并不可坐卧冷處。房中須宜火暖。肩背須裹綿衣。使血得熱則流。兒易生矣。若遇春秋偶寒。亦如前法。○暑月當令產母在無風清涼處。不可多人看。恐人多熱氣。遍襲。蓋血得熱則散溢。上蒸。致令產母頭痛而赤。不省人事。謂之血暈。若夏月風涼陰雨。亦不可任意取涼。恐生大病。慎之。慎之。○摩揣。臨蓐腹痛。切不可使穩婆摩揣。候雞水破。痛極尤當忍之。令人扶掖緩行。則兒自順。正豈有橫

逆之患。若胞水破。兒未下。謂之試水。此產甚遲。有隔
二三日產者。宜服八珍膠艾水止痛定。至五六日產
者甚多。但覺腹中運動。切不可容穩婆動手。及產母
用力。蓋兒出胞時。用盡其力。不能卽轉。多有過數日
方得力。續轉運。自然身正而下。舉世之難產者。雖由
平日居處失宜。往往皆是穩婆輕易動手。摩揣所至。
所以田野村婦。艱於產者。絕罕。惟富貴之家。不習勤
勞。任意眠坐。經絡凝滯。恣情飲啖。兒得肥甘。長養倍
常。更多不禁房室。頻泄母氣。自不能如勤勞村朴之

天生天化也。况乎臨月。一有腹痛。卽喚穩婆探候。驚動胎氣。傷其先天氣血之源。多致子母俱傷。亦有產後致變者。皆產時藏府受傷所致也。卽子之夭枉。多緣先天之氣不得其全耳。

卧法。○臨蓐。卧宜仰而正。不可偏側。坐蓐不可太早。蓋男胎向內。女胎向外。皆首居上。足居下。臨產時必倒轉順出。須再三緩緩扶掖走動。使得其旋轉。不然恐有橫逆之患。

催生。○坐蓐時用達生散。去芍藥。加枳殼。黃楊腦。童

便然必待胞水破腰痛甚方與熱服不可太早早則
先行惡露反致難產也○凡十月未足臨產腹痛或
作或止或痛不甚者名曰弄胎或腹雖痛甚而腰不
甚痛者或胎高未陷者或穀道未挺逆者或水漿未
渡者或漿水雖出而腹不痛者皆屬氣虛並非正產
之候惟宜獨參湯助之慎勿妄投藥餌致產母驚恐
而妄亂用力直待子逼門戶腰重痛極眼中如火穀
道挺逆時方可用力兼服催生藥如千金方用阿膠
三兩滑石一兩車前子二兩爲末飲服方寸匙不下

少頃再服此藥臨時服之不可先服

飲食宜忌○臨蓐飲食宜調不可不食受饑使母無力尤不可過食太飽使兒氣不能運多致子母受傷及乎產後發熱泄瀉中脘結痛皆緣飲食所傷卽湯水亦宜少用往往有膀胱破損良由引飲過多尿脬脹滿所致種種危候皆產前不慎之故尤忌飲酒每致血逆奔上急與熱童便壓之然多有不救者至於豬腎雞子之類皆難消化之物非但產後當忌臨產亦不可食

備法○產婦或不順理用草薺子十四粒。硃砂雄黃各五分。蛇蛻一尺。燒灰麝香一字爲末。將水和作一丸。先用川椒湯洗臍中。置藥於內。再用紙數重覆蓋。以帛繫之。卽下下卽去藥。○橫生逆生手足先出者以鹽擦兒手足心。○盤腸生而腸不收者用新汲水人醋噴面。當自收上。一法用草薺子十四粒搗爛貼產母頂心。其腸收上卽去之。一法以半夏末脗鼻中。腸自上。一方以草薺油調紙燃點燈吹滅。將烟熏鼻中。其腸卽上。

下死胎法○于死腹中者或熱病傷胎或顛仆高墜或驚動太早或觸犯禁忌或胎肥氣滯惡露已盡致胎乾子死身冷不能自出須驗產母面赤舌青腹中陰冷重墜是其候也然不若見紫黑血塊血縷尤爲確候至若爪甲與舌俱青腹脹氣喘口中臭氣者危矣急令穩婆動手以法下之遲則不收古法雖有童便調朴硝半兩及平胃散水酒煎調朴硝虛寒用理中湯倍參煎調芒硝等法然有時輒應有時不應良由產母元氣盛衰不同能行藥力與不能行藥故耳

亦有產難有兩兒一死一生者千金用蟹爪升甘
草二錢阿膠二兩以流水先煮蟹爪甘草去滓內阿
膠烊化服之血凝不下加桂心三錢藥人死者卽出
生者卽安神驗此千金法取蟹能散血而爪觸之易
脫物類相感之應也又有子死腹中用黃牛屎塗母
腹上立出者又有取竈心黃土爲散酒服二錢匙立
出者又有以夫尿煮沸服之者又有以冬葵子卽何
子半升阿膠三兩煎服者又有用甘草筒桂蒲黃香
豉煎成入雞子一枚調服者若冬月胎死堅梗腹中

覺冷用香桂散加烏頭及黑神散黑龍丹皆可應用
內外有邪者五積散最宜若死胎及胎衣惡血上逆
搖嘔昏暈用小便乘熱灌之但得一口下咽卽止若
面赤舌青子死母活面青舌赤母死子活唇青吐沫
或面舌俱青子母俱亡

陸斗巖治一婦有胎四月墜下逾旬腹脹發熱氣
喘面赤口鼻舌青黑診之其脈洪盛曰胎未墜也
面赤者心火盛而血乾也舌青口鼻黑肝氣絕而
胎死矣內外皆曰胎墜久矣復診色脈如前以蛇

蛭煎湯下平胃散加芒硝歸尾服之須臾腹鳴如雷。胎脫。胎前產後。一死胎而愈。

胎衣不出。臍腸墜斷。惡露入胞。脹大不能出者。二味參蘇飲童便和服。壯實人失笑散以消瘀血。甚則平胃散加朴硝下之。胞衣不下古法用蛇蛻一條香油燈上燒研入麝香爲末。童便調服。或加蘄艾阿膠蘇木各一錢。麥芽末打糊爲丸。名烏金丸。難產及死胎不出。俱童便服之。亦有單用蛇蛻酥炙爲末。童便下一錢匙者。千金治胞衣不出。胞爛喘急欲死。用

牛膝湯服之。卽下。妊娠肥盛多痰。阻逆氣道而致產難。及子死胎乾。或子下而胎衣不出。半夏爲散。尿服方寸匙。連進三服。并用吹鼻取嚏。以激動關竅。大妙。○常見下死胎胞衣。用朴硝等法。非惟不効。卽使得下。胃氣大傷。往往不能收功。丹方用草蓆子肉。研塗母右脚心。胞下急洗去。緩則腸亦出矣。今人以產婦頭髮入口作嘔。胎衣自出。其法甚効。如不出。反逆上者必死。

交骨不開。陰門不閉。子宮不收。三者皆元氣不足。

交骨不開者。加味佛手散。助其血氣。而開之。古法
用加味芎歸湯。卽佛手散。加龜版灰血餘。每見服此
藥者。惡血凝滯。反成不救。惟大劑人參。童便。入芎歸
劑中。助其血氣。開闔之功。立致也。若見咬牙昏暈。急
以熱小便灌之。稍遲則無濟矣。若元氣不虛者。只用
佛手散。小便服之。單用小便亦得。人參不必也。○陰
門不閉者。十全大補倍參桂。補斂之。若初產腫脹。或
痼痛而不閉者。當用逍遙散。加荆芥牡丹皮。切忌寒
涼。○子宮不收者。補中益氣加酒炒白芍一錢。肉桂

五分補而舉之。或助以外治之法。如草薢子貼頂心之類。

薛立齋治一婦。子宮脹大。二日方入。損落一片如猪肝已。而面黃體倦。飲食無味。內熱晡熱。自汗盜汗。用十全大補二十餘劑而愈。仍復生育。